

HOMANO

Paoro Iokanatsopatakiti Homa Auakanimoni

1 ¹Nota Paoro iokanatsopata hītemoni. Xesosi Kristo nitirikarano nota. Teoso mereēno nota iua iokanatakiti kākitimoni nininiua īkapani. Iua akiritano nota, Teoso iokanapirena erekari kākitimoni nisāpiretini īkapani. Ikara parīkatxinoka inireka nikamini. ²Kitxakapirīka Teoso sākire sāpiretakani sāpiretaua Teoso sikaenetakiti, iua iokanapirena erekari. Teoso sākire iōkatsopatakoriā ikara atatsopataāka.

³Ia Teoso iokanapirena erekari sāpiretaua aāuīte Xesosi Kristo Teoso ākiri ininiua. Kākiti itxapekua. Iuasaaki Tavii apika mekaniri itxaua. ⁴Iuaritika Teoso ākiri itxaua. Erekari Matamatakoti oerekari kākiti Teoso ākiri ininiua Xesosi, kotxi ōkitikari Xesosi ipīkaripeka. Iuaīkana aua itxa. Ikara posotiiretxi apiari oerekari kākiti Xesosi Teoso ākiri ininiua. ⁵Xesosi Kristo sikaua ikinipoko erekari. Ininiā iokanataua ikini itixitimoni, kākiti isākire asāpiretini īkapani, isākire auikinina īkapani, isākire iaōka ikaminina īkapani. Ikara atoko aparīkauata Kristo īkapani.

⁶Hītepekana, Teoso akiritai hīte apaka Xesosi Kristo nakitiakori hininiua īkapani. ⁷Ininiā nota iokanatsopata hītemoni Teoso tirketakinimoni, Homa sitatxiti auakanimoni. Teoso akiritai hīte iua nakitiakori hininiua īkapani. Aīri Teoso, Apiananiri Xesosi Kristo apaka sikari ikinipoko erekari hītemoni. Ikamaerekaxiniretai hīte.

Paoro Nirekari Isini Homa Auakanimoni

⁸Merepanika nitxari niTeosone: “Erekapitikai, kotxi Homa auakani iteene auikari pisäkire. Ikini tōpati auakani kenakopiretari ninoa auikiniri pisäkire,” nitxari Teoso Xesosi Kristo uākaā.

⁹Nisākirauatakasaaki Teosokata, nimisäkiretari Teoso hīte īkapani. Ātipirika nimisäkiretari Teoso hīte īkapani. Teoso imarotari ikara nisäkire atāo inini. Nota parīkauata Teoso īkapani. Iuanoka ninireka nikamini. Nisāpiretari iua iokanapirena erekari imi pirena kākitimoni. ¹⁰Nimisäkiretakasaakiri Teoso, nitxari: “Pauiritiniāno, ninirekari paītiki Homa auakanimoni nisini. Mitxi lapakata ninoamoni nisini. Pinirekiniāri iuaā nisini, pimoianatano ninoamoni napokini īkapani,” nitxari. ¹¹Iteene ninirekari naōkitiniri hīte, kotxi ninirekari Teoso kamatarapariniri hākixinire nisäkireē. ¹²Ininiā nota kamatarapariniretaiko hīte, kotxi himarotari nota iteene auikiniri Xesosi sākire. Apaka hīte kamatarapariniretano nota, kotxi hīte apaka iteene auikari Xesosi sākire.

¹³Nitariakori, ninirekari himarotiniri itokatapiima niamatama hītemoni nisini īkapani, txamari iuasaaki lapakata nisini. Itomaneri kākiti Xoteo minakaniua ātiātaā auakani auikari Xesosi sākire. Ininiā iua atokotxikana ninirekari kaiāopokori kākiti hīte sauaki auakani apaka auikiniri Xesosi sākire. ¹⁴Nisāpiretari Teoso sākire ikininapemoni. Nisāpiretari sitatxi auakanimoni. Nisāpiretari itopa auakanimoni apaka. Nisāpiretari iōkatsopari imarotakanimoni. Nisāpiretari iōkatsopari mimarotakanimoni apaka. Ikara niparīka. ¹⁵Ininiā iposope nitxa nisāpiretiniri Teoso iokanapirena erekari hīte Homa sitatxiti auakanimoni apaka. Ikinika nitaparaā nisāpiretai.

¹⁶Na nipētatauata Kristo iokanapirena erekari nisāpiretinii, kotxi iua iokanapirena oerekaua Teoso posotiire iua sākire auīākani maerekani imaktxakini īkapani. Kaposotiireri iua, ininiā imaktxakari ikinimane maerekani, iua sākire auīākani maerekani. Ikara ikaminana Xoteoakori merepanika. Eereka ikaminana Xoteo minakaniua apaka. ¹⁷Teoso iokanapirena erekari sāpiretau Teoso txīkitakiniri kākiti atāo inakarinoka ikamini. Teoso sākire auikikoānokara, kākiti txīkitakaāka atāo inakarinoka ikamini. Teoso sākire iōkatsopatakori txari:

Kākiti atāo inakarinoka kamakani auini erekari, kotxi ninoa auikari Teoso sākire.

Kākiti Kamakiti Maerekati

18 Teoso iaxiti auakari oerekaua iua omanākaruatini kākiti maerekani xika, ininiākara iua misiritariko kākiti, kotxi kākiti linirekari Teoso paniātakiti ikamini. Ikamarina maerekatina. Maerekati ikamakasaakina, ikipatarina atão inakari. 19 Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitimoni iua imarotinina ĩkapani. 20 Teoso kamari itixi, ininiā kākiti atamatakasaakiri Teoso kamakiti, imarotari kiātokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiākara kākiti imarotapitikari Teoso auini. Ininiākara na atão kākiti sākire: “Na nimarotari Teoso auini inini.”

21 Kākiti imarotari Teoso auini, iuaritika !isāpiretarina Teoso: “Atão Teoso pitxaua,” !itxarina. !Isāpiretarina Teoso: “Erekapitikari pikamakiti ate ĩkapani,” !itxarina. !Kiĩkitena. !Imarotaikarina atão inakari, kotxi ākixinireēna maerekatina aua. 22 Ninoa sākire: “Kimaroreua ate,” txamari !kiĩkitena. 23 Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hĩte ateosone,” itxana.

24 Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina ĩtona nireĩkiti. Ninoaka na paxitauana ĩtona, kotxi āti sirĩka ātikata. 25 !Inirekarina auikinirina atão inakari Teoso sākire. Inirekarina auikinirina atão minakati. Teoso kamakitimoni itxana: “Pite ateosone. Aparĩkauata pite ĩkapani,” itxana. Ikinipoko kamakarimoni !itxana: “Pite aTeosone. Aparĩkauata pite ĩkapani,” !itxana. Atão inakari kamakani ātipirika txari ikinipoko kamakari: “Peerekai pite.” Ameē.

26 Ikara kākiti maerekani xika, Teoso takanapana ninoa. Auiritana maerekati kākiti kapēta txĩkitaākari, ĩtona nireĩkiti ikaminina. Ininiā sito na nirekaikari kikikata osirĩkini. Sito nirekari āto sitokata osirĩkini. !Apakata. Ikara maerekati itxaua. 27 Iua atokokana kiki !inirekaikari sitokata isirĩkini. Kiki nirekari āti kikikata isirĩkini. !Apakata. Ikara maerekati itxaua. Ininiākara ĩtona misiritaākako imaerekanina xika.

28 Ninoa imaroreẽ !nirekarina imarotnirina Teoso, ininiã Teoso takanapana. Auiritana ixinikinirina atão minakati. Maerekatnoka ixinikakitina, ininiã ikamarina atão minakati. 29 Åkixinireẽna auu ikini sereti maerekati. Iĩtona nireẽkitinoka ikamana. Åtipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Åkixinireẽna ixikotarina åti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatnoka. Aãpirena ikamana. 30 Imisãkirepitarina åti. Omanatarina Teoso. !Paxitarina apanakini imisãkiretakasaakina. Iuikauana. Åtipirika: “Paimatireua ate,” itxanãtana. Ixinikapikarina: “Natokopa itxa apikomoni maerekati akamini.” !Ikĩpitarina iri paniãtakiti, inoro paniãtakiti pakini. 31 !Kĩikitena. !Ikamarina ikamaenetakitina. !Itiretarina inirimane. !Nirekarina neenamtxi ixipokinina. !Iamonĩkana apanakini. 32 Teoso sãkire txari: “Kãkiti ikara atoko inakani ipinapitikako. Ninoa ipinini atão.” Ikara Teoso sãkire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

Teoso Misiritari Maerekati Kamakani

2 1 Atxiĩti hĩte txari: “!Erekana ninoa, kotxi ninoa kamari maerekati,” hĩtxa. !Apakata ikara atoko hinini, kotxi hĩte apaka kamari maerekati ninoa kamakiti atokotxikana. Ininiã !apakata kãkiti akiritiniri åti kãkiti maerekati kamakari ininiua. 2 Apakatapitika Teoso akiritiniri kãkiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. 3 “Ninoa maerekati kamakani misiritaãkako,” hinakasaaki, hĩxinikari hĩte apaka kamari maerekati ninoa kamakiti atokotxikana. Ininiã hĩte apaka !hinapakapaniri Teoso misiritinii hĩte. 4 Atxiĩti na hĩte maãkatari Teoso, kotxi hĩte txari: “Teoso katiraõkiri itxaua,” hĩtxa. Atxiĩti na himaãkatari Teoso, kotxi iuasaaki !imisiritapanikai hĩte. Atxiĩti na himaãkatari Teoso, kotxi Teoso åtipirika mĩteenekai hĩte. Teoso nirekari hĩtakanapiniri maerekati hĩkamakiti, erekarinoka hĩkamini !kapani. Ininiã iua tiretai hĩte. Ikara hĩte imarotamako. 5 Txamari hĩte paikoxinirei. Na hinirekari himaerekani hĩtakanapini. Ininiã himisiritiko apiaãpotako. Kãkiti misiritiko õti apokasaaki, Teoso misiritapitikaiko hĩte. Iuasaaki kãkiti imarotariko Teoso omanãkare

imaerekani xika, kotxi Teoso atão imarotari kākiti kamakiti. ⁶Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷Aua kākiti ātipirika erekari kamakani. Iisāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina īkapani. ⁸Apanakinipekana kamari inireēkitinoka. !Inirekarina atão imarotinina. Maerekatinoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹Ikinipoko kākiti maerekati kamakani maxikaākako. Atatsiirauatako. Merepanika Xoteo misiritaākako, eereka Xoteo minakaniuwa apaka misiritaākako. ¹⁰Teoso txanako kākiti erekari kamakani: “Erekapitikai hīte.” Ikara atoko itxanako merepanika Xoteoakori, eereka Xoteo minakaniuwa apaka. Teoso paxitanako ninoa. Ikamaerekaxiniretanako. ¹¹Teoso misiritana ikini kākiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹²Xoteo minakaniuwa !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iusaaki Teoso !ikamaerekatai pite. ¹⁴Xoteo minakaniuwa !auari Teoso sākire iōkatsopatakori. Iuaritika atxiīti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinirena. ¹⁵Teoso paniātakiti iaōka ikamakasaakina, oerekarina imarotininina atão inakari ākixinirena. Ākixinirena sākire sāpiretana atão. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶Kākiti kamakiti imarotiko ōti apokako. Iusaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakinini apaka isāpireta. Iusaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniätakiti Iökatsopatakori

17 Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniätakiti iökatsopatakori atemoni. Atenoka Teoso anaakori atxaua,” hītxa. Ininiã hīteka iuikaua. 18 Hīte imarotari Teoso nireëkiti hīkamini. Himarotari Teoso paniätakiti iökatsopatakori, ininiã himarotari erekari apiari hīkamini. 19 Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiã ate imarotari apanakini aōerekini. Ininiã ate tirikapi atoko atxaua. Apanakini ipiã sikani atoko itxana ninoa.” Ikara atoko hītxa hīte. 20 Hītxari: “Koerekarerini atxaua. Kākiti miūkiteni oereëkani atxaua. Ate oerekari kākiti poião imarotakani. Ate imarotari ikinipoko. Aimarotari atão, kotxi Teoso sākire iökatsopatakori aua atemoni.” Ikara atoko hītxa hīte. 21 Hīte Xoteo inakaniua oerekari apanakini. Kinirepa kona hīteka oerekaua apaka? Hīte ôtākikari apanakini: “!Piūtiriuatape”. Kinirepa hīte na takanapari hīitiriuatini? 22 Hīte ôtākikari apanakini: “!Pisiriŋape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiã kinirepa hīitiriŋari ninoa teosone aikoti tii? 23 Hīte iuikaua, kotxi Teoso sākire iökatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. 24 Teoso sākire iökatsopatakori txari:

Hīte Xoteo xika, Xoteo minakaniua misākirepiretari Teoso, itxa Teoso sākire iökatsopatakori.

25 Teoso takaōtxikare aua hītoã. Teoso paniätakiti hīkaminiã, erekapitikari Teoso takaōtxikare hītoã auini. Teoso paniätakiti iökatsopatakori himakamakaniã, Teoso takaōtxikare mauakinini atoko hītxaua. 26 Xoteo minakatiua, Teoso takaōtxikare iitoã mauakini, Teoso sākire iaōka ikaminiã, Teoso txariko: “Tua Xoteo atokotxikana itxa. Nitakaōtxikare iitoã auakiti atokotxikana itxaua.” 27 Hīte Xoteoakorimoni aua Teoso paniätakiti iökatsopatakori, iuaritika !hīkīpitari Teoso sākire. Teoso takaōtxikare auapitikama hītoã, iuaritika !hīkīpitari Teoso sākire. Xoteo minakaniua !auari Teoso takaōtxikare iitoãna, iuaritika ninoa kamari Teoso paniätakiti iökatsopatakori. Ikara atoko ininiã, ninoa oerekai himaerekani.

28 Kiripa atão Xoteo? Kiripa Teoso nakiti txataua? Kirimonipa aua Teoso takaōtxikare atão inakari? Teoso takaōtxikare iitoã auakini, na ikinikani atão Xoteo itxauana. 29 Teoso paniätakiti

iōkatsopatakori !oerekaua Teoso nakiti aniniua. Xoteo atão inakariua, Teoso nakiti itxaua ākixinireē. Teoso takaōtxikare aua iua ākixinireē. Erekarī Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

Teoso Kamari Ikamaenetakiti

3 ¹Atxiīti hīte txano nota: “Teoso apakapari Xoteo. Teoso apakapari Xoteo minakaniua apaka, ininiā !apiaerekata Xoteo aniniua. !Apiaerekata Teoso takaōtxikare aītoā auini.” Atxiīti ikara atoko hītxa. Txamari na atão. ²Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri īkapani, inīkatinirina īkapani. ³Iuaritika apanakini Xoteo !auikari Teoso sākire. Ikara xika atxiīti Teoso !ikamari ikamaenetakiti? ⁴Ikamapitikari. Atxiīti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atão ininiua. Isāpiretakasaakiri kākiti imisiritiko imaerekani xika, iusaaki imarotaākako Teoso kamakiti atão inini.

⁵Atxiīti kākiti txano nota: “Atão minakati akamakasaaki, apanakini apia imarotari Teosonoka kaminiri atão inakari. Ininiā erekari akaminiri atão minakati apanakini imarotiniri Teosonoka kaminiri atão inakari. Ininiā !apakata Teoso misiritiniua ate, maerekati akamini xika.” Atxiīti aua kākiti ikara atoko ina sākiretakani. ⁶Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷Atxiīti kākiti txaua: “Atão minakati asāpiretakasaaki, apanakini imarotari Teoso sākirenoka atão ininiua. Atão aminasākiretakaniā, apanakini kākiti txari: “Teosonoka ereka,’ itxana. Ininiā !apakata Teoso misiritiniua amaerekani xika.” Atxiīti aua kākiti ikara atoko ina sākiretakani. ⁸Ikara atão ininiā, maerekati makama erekari apokini īkapani. Txamari ikara sākiretxiti na atão. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekarī

⁹Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana

itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti.

Erekari kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa.

Itotarina imisirienetirinina apanakini. Kākiti sākire imini tsiā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatiīka inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamatzxi itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini īkapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekaua itxīkitakiniri kākiti atāo inakari kamakani ininiua. Teoso paniātakiti ikinika !ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²²Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³Kotxi ikinimane kamari maerekati, ininiā !aposota aāpokini Teoso iotximeremoni. ²⁴Maerekati kamakaniua ate, iuaritika Teoso sikari ikinipoko erekari maxikatiīka atemoni, ininiā Teoso kamaerekataua ate, kotxi Kristo Xesosi iīkitxirauata ate īkapani

ipíkasaaki. Ininiã Teoso !imisiritaikaua amaerekani xika. ²⁵Teoso sikari Xesosi ipinini kãkiti ikapani. Xesosi ipíkasaaki, Teoso makatxakari maerekati akamakiti. !imisiritaikaua ate, kotxi aũuikari Xesosi ipinini ikitxitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atão inakarinoka ikamini. Mitxipitipanika Teoso !imisiritana kãkiti imaerekanina xika. Iãtapari iketo manapi apokini, kotxi iamoniãkari kãkiti. ²⁶Teoso sikari Xesosi, ininiã ipipe kãkiti ikapani, ininiã uatxa Teoso misiritari kãkiti maerekati ikamini xika, ininiã aimarotari Teoso atão inakarinoka kamakari itxaua iua, kotxi !auritari maerekati kamakari inapakakini. Erekarari Teoso, ininiã iua posotari ikamaerekatini kãkiti Xesosi sãkire auiãkani.

²⁷Ininiã !apakata aũuikiniua, kotxi !aurari aparĩka akamaerekatakiri, ininiã !apakata aũuikiniua Teoso paniãtakiti iõkatsopatakori akamakasaaki. Teosora kamaerekataua, Xesosi sãkire aũuikasaaki. ²⁸Teoso paniãtakiti iõkatsopatakori kamakari atxiiti !ikamaerekataãka, kotxi !auikari Xesosi sãkire. Xesosi sãkire auikakarinnoka ikamaerekataãka. ²⁹Atauako Teoso Xoteo Teosonenanini itxataua? Konapitini. Xoteo minakanuia Teosonekanera apaka itxaua Teoso. ³⁰Teoso ãtinoka aua. Iua kamaerekatana Xoteo, Xesosi sãkire auiãkani. Iua kamaerekatana Xoteo minakanuia apaka, Xesosi sãkire auikasaakina. ³¹Ikara atoko ininiã, atxiiti kãkiti txari: “Teoso kamaerekataua ate, kotxi aũuikari Xesosi sãkire, ininiã Teoso paniãtakiti iõkatsopatakori !itxaika. Ininiã !akamaikari,” itxa kãkiti sãkire atxiiti. Konapitini. Xesosi sãkire aũuikasaaki, anirekarari iteene akaminiri Teoso sãkire paniãtakiti iõkatsopatakori.

Atão Inakari Kamakari Apraõ

4 ¹Maxinikari Apraõ aĩri kitxakapiriãkari. Natokopa itxa iua imarotakiti, Teoso kamaerekatini kãkiti? ²Apraõ kamakiti erekarari kamaerekataãkamariko iua, ininiã iua iuikamauako. Txamarari iua iuikiniua !aurari Teoso apisatoõ. ³Teoso sãkire iõkatsopatakori txari:

Apraõ auikari Teoso sãkire, ininiãkara Teoso txĩkitakari iua atão inakari kamakari ininiua.

⁴Parĩkauatakari ipatrãote sikari iparĩka iki iuamoni. Maxikatiika !iikitxitari iua. Isikari, kotxi iparĩkauata. ⁵Kãkiti auikiniãri Teoso kamaerekatini maerekati kamakari, iua kãkiti !iuikari iuaka parĩka. Imarotari iparĩka !ikamaerekatari iua. Teoso txĩkitakari ikara atoko inakari kãkiti atão inakari kamakari ininiua, kotxi

iua auikari Teoso sãkire. ⁶Kitxakapirĩka Tavii txari ikara atoko. Iua sãpiretari kãkiti Teoso sikakiti erekari apakapakani. Teoso txĩkitakari iua atão inakari kamakari ininiua. Na iparĩkani txĩkitakari iua atão inakari kamakari ininiua. ⁷Tavii txari:

Teoso makatxakasaakiri kãkiti maerekani, !atamataikari maerekati ikamakiti. Teoso takari ikinipoko erekari kãkiti ikara atoko inakarimoni.

⁸Teoso liaõtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirĩka.

⁹Atxiĩti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtixikare auaiõtatakiti ikapaninanini?” Konapitini. Ia erekari Teoso sikakiti Teoso takaõtixikare mauaiõtatakini ikapani apaka. Nisãpiretapekai ia Teoso sãkire iøkatsopatakori:

Apraõo auikari Teoso sãkire, ininiãkara Teoso txĩkitakari iua atão inakari kamakari ininiua,

itxa Teoso sãkire iøkatsopatakori. ¹⁰Kirisaakipa Teoso txĩkitakari Apraõo atão inakari kamakari ininiua? Atauako Teoso takaõtixikare Apraõo iitoã auakasaakiikani? Konapitini. Takaõtixikari Apraõo iitoã takiko apisapanikara, itxĩkitakari Apraõo atão inakari kamakari ininiua. ¹¹Merepanika Teoso txĩkitakari Apraõo atão inakari kamakari ininiua, eerekaikara itakari itakaõtixikare iitoã. Ikara Teoso takaõtixikare oerekari, mitxipeka Teoso txĩkitakari Apraõo atão inakari kamakari ininiua, kotxi iua auikari Teoso sãkire. Apraõo auikari Teoso sãkire, Teoso takaõtixikare iitoã auini apisapanika. Ininiã Apraõo ikini Teoso sãkire auiaãkani iri atoko itxaua. Atxiĩti Teoso takaõtixikare iitoãna !auari. Iuaritika ninoa iri atoko itxaua Apraõo. Teoso txĩkitakari ikinimane iua sãkire auiaãkani atão inakari kamakani ininiuana. ¹²Apraõo Teoso takaõtixikare auaiõtatakini iri atoko itxaua, ninoa auikiniãri Apraõo sãkire Apraõo auikiniri atokotxikana, kotxi Teoso auikari Teoso sãkire Teoso takaõtixikare iitoã auini apisapanika.

¹³Teoso sikaenetari itixi Apraõomoni, imekaniriakori pakinimoni. Ikara atoko Teoso sãkire, kotxi Apraõo auikari Teoso sãkire. Iua auikari Teoso sãkire, ininiã Teoso txĩkitakari iua atão inakari kamakari ininiua. Apraõo kamakiti erekari !itxĩkitakari Teoso sikaenetiniri itixi Apraõomoni. ¹⁴Kãkiti erekari kamakari Teoso sãkire mauiaãkati !apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auiaãkanimoninani.

¹⁵Teoso paniātakiti iōkatsopatakori makamakati misiritaākako. Teoso paniātakiti iōkatsopatakori mauakaniā, maerekati !auari. Txamari auapitika Teoso paniātakiti iōkatsopatakori.

¹⁶Ininiā kākiti auikasaakiri Xesosi sākire, apakapari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitimoni. Ininiā ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniātakiti iōkatsopatakori auakini apakapari. Xoteo minakaniu Teoso sākire Apraão auikini atoko inakani apaka apakapari. Ate amakinika iri atoko itxaua Apraão. ¹⁷Teoso sākire iōkatsopatakori txari:

Teoso txari Apraão: “Nota txīkitakaiko pite itori āti uāka iri pininiua.”

Ininiā Teosomoni iua aīri atoko itxaua, kotxi Apraão auikari Teoso sākire. Teoso txīkitakana ipīkani iuaīkana auāki inini. Iua kamari mitxi mauakati auini.

¹⁸Apraão kiomātxipeka inakasaaki, kona keeneri. Iuaritika auikari Teoso sākire. Iātapari Teoso sikaenetakiti apokini. Ininiā apanakini āti uāka iri atoko itxapekaua Teoso sākire iaōka. Teoso sākire iōkatsopatakori txari:

Papika mekaniriakori kaiāopokopaniriko.

¹⁹Apraão sē anokanani inakasaaki, imarotari iīto ipinanapanoka inini. Imarotari Sara !oposotaikari keene onini. Iuaritika iteene auikari Teoso sākire. ²⁰!otoka auikiniri Teoso sikiniri isikaenetakiti iuamoni. Iua auikari Teoso sākire itaparaxinireritika. “Teoso posotari ikinipoko ikamini,” itxa. ²¹Iua iteene imarotari Teoso posotiniri isikiniri isikaenetakiti. ²²Apraão auikari Teoso sākire, ininiākara Teoso txīkitakari iua atão inakari kamakari ininiua. ²³Na Apraāonanini Teoso txīkitaka atão inakari kamakari ininiua. ²⁴Iua txīkitakaua ate apaka atão inakari kamakani aniniua, aāuikiniāri Teoso sākire. Aāuīte Xesosi ipīkasaaki, Teoso ōkitikari iua iuaīkana auini īkapani. ²⁵Teoso sikari Xesosi kākitimoni ipinini īkapani maerekati akamakiti xika. Teoso ōkitikari iua iuaīkana auāki inini īkapani, ate ikamaerekatini īkapani.

Teoso !Omanataikaua Ate

5 ¹Ininiā Teoso kamaerekataua, kotxi aāuikari isākire, ininiākara aāuīte Xesosi Kristo iotokakari Teoso omanatiniua ate. Teoso

!omanataikaua ate. Uatxa apakapaua ate. ²Aãuikasaakiri Xesosi sãkire, iuasaaki aimarotari ikinipoko erekari Teoso sikakiti atemoni ikiniõtika. Iteene apoxokoniuata, kotxi aiãtapari Teoso aaõkitini, iua iotximere aãtamadini ïkapani. ³Apanakini misiritakasaakia, apoxokoniuata apaka, kotxi Teoso oerekaua amïteenekiniri amisiritiko. ⁴Amisiritiko amïteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. ⁵Erekari apokini aiãtapiniã, aãpakapapitkariko erekari, kotxi aãkixinireë aimarotari Teoso iteene tiretiniua. Erekari Matamatakoti Teoso sikakiti atemoni, oerekaua Teoso tiraõki aãkixinireë.

⁶Erekari akamini amaposotakanisaaki, Teoso amanirekakanisaaki, Kristo ipina ate ïkapani. Iua ipina iketo õti manapi. ⁷Atxiïti kãkiti ipina atão inakari kamakari ïkapani iua mapinakani ïkapani? Atxiïti !ipina iua ïkapani. Atxiïti kãkiti ipina ãti erekari kamakari ïkapani, iua mapinakani ïkapani? Atxiïti ipina iua ïkapani. ⁸Teoso oerekaua ate, iua iteene tiretiniua ate, kotxi Kristo ipina ate ïkapani maerekati akamapanika anakasaaki.

⁹Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminaua, kotxi Teoso !omanataikaua. !imisiritaikaua. ¹⁰Ate Teoso omanatakani anakasaakia, Teoso ãkiri ipina ate ïkapani. Ininiã Teoso mokaiakari !atxaikaua. Iua apakapaua. Iua apakapaua, ininiã amaerekani imakatkaxa, ininiã aãuapininiika, kotxi iua õkitikaua auapininiika anini ïkapani Teosokata, kotxi Kristo auini auapika. ¹¹Teoso kamari ikara ate ïkapani. Apikomoni iua kaminapanikauako ate, kotxi iua kamapoxokonitaua, kotxi aãuïte Xesosi Kristo mikanapiriãua ate Teosomoni.

Adão, Kristo Pakini

¹²Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoã maerekati ikamakitina xika, kotxi iuasaaki !isãpiretapanikari ipaniãtakiti. ¹⁴Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakori !apokapanika, iuaritika ikinimane ipina. Atxiïti kãkiti !ikamari maerekati Adão maerekani atoko, kotxi iua

!ikamari Teoso paniãtakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipĩkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ãkapani. Teoso siãkiti iiki !auari. !Erekari Adão sikakiti. Peerekari Xesosi Kristo siãkiti. ¹⁶Kiki ãtika Adão inakori kamari maerekati. ãtinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iusaaki imaktxakari ninoa maerekani. ¹⁷Kiki ãtika, Adão inakori maerekani xika, Teoso txĩkitakari ikinimane ipinini. !Erekari iua kiki kamakiti. ãti kiki, Xesosi Kristo inakori kamakiti peerekari. Iua txĩkitakari kãkiti ãkixinire katapara inini maerekati imakamakani ãkapani. Kãkiti ikara atoko inakari Teoso sikari ikinipoko erekari. Itori isika. Itxĩkitakari iua atão inakari kamakari ininiua. Ia iparĩka iiki !auari.

¹⁸Adão kamari ãtinoka maerekati, iuaritika iua maerekati txĩkitakari Teoso misiritinina ikinika kãkiti. Iua atokokana Xesosi kamakiti ãtika txĩkitakari Teoso kamaerekatina kãkiti ninoa ãtipirika auini ãkapani. Iusaaki atãonoka ikamakiti. ¹⁹Kiki ãtika Adão inakori na kamari Teoso sãkire iaõka, ininiã itxĩkitakari kãkiti itomaneri maerekati ikaminina. Kiki ãtipekana Xesosi inakori kamari Teoso sãkire iaõka, ininiã itxĩkitakari kãkiti itomaneri atão inakari kamakani ininiuana.

²⁰Teoso sikari ipaniãtakiti iõkatsopatakori Moisesimoni. Iusaaki kãkiti imarotari maerekati itori ikamakitina, ininiã maerekanitxi apiaãpota, kotxi Teoso paniãtakiti iõkatsopatakori auape. Maerekanitxi apiaãpota, iuaritika erekari Teoso sikakiti kãkitimoni apiata. ²¹Maerekanitxi txĩkitakari kãkiti ipinini. Erekari Teoso sikakiti kãkitimoni txĩkitakari kãkiti auini ãtipirika imaxipokakani tĩkane, kotxi aãuĩte Xesosi Kristo txĩkitakari kãkiti atão inakari kamakari ininiua. Ininiãkara kãkiti auapininiika, kotxi Xesosi Kristo kamaerekatana.

!Anirekaikari Maerekati Akamini

6 ¹Ininiã erekari atxiĩti apikomoni maerekati akamini, ikinipoko erekari Teoso sikakiti apiata auini ãkapani?

²Konapitini. Teoso makatxakapekari amaerekani, kotxi iusaaki

!anirekaikari apikomoni maerekati akamini. Anireĕkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴Apatxisatiko oerekari Kristokata ikatakoni atoko aniniua, ininiā !anirekari apikomoni maerekati akamini. Kristo iri Teoso posotiire ōkitikari imi, uuaĩkana auāki inini ĩkapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini ĩkapani.

⁵Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo uuaĩkana auini atokokana, aāuini amaneri. Peerekari, kotxi aāuapika Kristokata, ātika atoko aniniua iuakata. ⁶Mitxi anireĕkiti xipope, kotxi Kristo makatxakari amaerekani aamina ĩpiriāmitakari nopini ipĩkasaaki ate ĩkapani. Ininiā mitxi anireĕkiti posotiire !auaika. Ixipokaākapeka, kotxi mitxi anireĕkiti maerekatinoka. Ininiā maerekanitxi nitiriakori atoko !atxaikaua. Aimarotari ikara. ⁷Maerekanitxi na paniātaikari kākiti ipĩkari.

⁸Kristokata ipĩkani atoko aniniā, aimarotari iuakata aāuini apaka. ⁹Ipĩkasaaki ōkitikaāka, ininiā !ipinaika. Aimarotari ikara. Ipĩkitxi na kaposotiireikari uuaĩkana Kristo ipinini ĩkapani. ¹⁰Iua ipina maerekanitxi posotiire ixipokini ĩkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireĕkitinoka ikamini ĩkapani. ¹¹Iua atoktxikana anireĕkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireĕkitinoka akamini ĩkapani, kotxi Kristo Xesosikata aāuapika.

¹²Ininiā na hāuiritapiri hiĩto paniātinii maerekati hĩkamini. Na hĩkamapiri maerekati hiĩto nireĕkiti. ¹³Na hāuiritapiri hiĩto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hūako kaminiri maerekati. Na hĩkamapiri maerekati hiĩto nireĕkiti. Hĩteka hĩsikauako Teosomoni, kotxi mitxi ipĩkani atoko hĩtxaua, eereka Teoso txĩkitakai auāki uuaĩkana hinini, ininiā hĩsikari hiĩto ikinika Teosomoni. Atāo inakarínoka hĩkamako hōkiā, hinamaā, hūakoā, imakinika hiĩtoā. ¹⁴Uatxa maerekanitxi apatrāote atoko !itxaikauako. Uatxa amisiritiko !auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iusaaki imakatzakari amisiritiko.

Atão Inakari Nitiriakori

15 Ininiã atxiĩti hĩtxano nota: “Maerekati makama, kotxi amisiritiko !auaika Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, imakatzakari amisiritiko. Ininiã makamari maerekati,” atxa atxiĩti. Konapitini. 16 Himarotari, hãuiritiniãri kãkiti paniãtinii iua nireẽkiti hĩkamini, ininiã iua hĩpatrãote atoko itxaua. Iua nitiriakori atoko hĩtxaua, kotxi hĩkamari iua paniãtakiti. Maerekanitxi hĩpatrãote ininiãua, hĩkamari maerekati, ininiã hĩpina. Ininiã kona hãua Teosokata ãtipirika. Teoso hĩpatrãote ininiãua, iua paniãtakiti hĩkama, ininiã atão inakarinoka hĩkama. 17 Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hĩtxaua. Uatxa maerekanitxi nitiriakori !hĩtxaikaua, kotxi iteene hĩkĩpitari hõerekiko. 18 Teoso makatzakapekai hĩte, ininiã uatxa maerekanitxi nitiriakori !hĩtxaikaua. Uatxa Teoso nitiriakori hĩtxaua, ininiã atão inakarinoka hĩkama. 19 Ikara atoko nitxa sãkireta hĩtemoni, kotxi himarotari nitiritxi, patrão pakini pirena. Himarotakiti poiãoka. Mitxi hãuiritari hiĩto kaminiri maerekati inireẽkiti. Hãuiritari hiĩto apikomoni maerekati ikamaãpotini. Apiaãpota maerekati hĩkamakiti. Iuasaaki hiĩto maerekanitxi nitiri atoko itxaua. Uatxa hĩsikari hiĩto Teosomoni atão inakari nitiri ininiua ãkapani, ininiã hĩkamariko atão inakarinoka. Ininiã Teoso nakitiakorinoka hĩtxaua.

20 Maerekanitxi nitiriakori hinakasaakiua, atão inakari nitiriakori na hĩtxaua, ininiã atão inakari na paniãtai hĩte atão inakarinoka hĩkamini. 21 ãkiripa erekari hãpakapa, maerekati mitxi hĩkamakasaaki? Kona kapakaparei. Uatxa hĩpẽtauata maerekati mitxi hĩkamakiti xika. Maerekati kamiko xika kãkiti ipina, ininiã kona aua Teosokata ãtipirika. 22 Uatxa maerekanitxi na paniãtaikai hĩte. Uatxa Teoso nitiriakori hĩtxapekaua, ininiã hĩkamari ikinipoko Teoso ãkapani. Ininiã hãuapininiika hĩtxako Teosokata ãtipirika. 23 Maerekanitxi kãkiti patrãote atoko itxa. Iĩkitxitari kãkiti parĩkatxi ãki, txamari ipĩkitxi itxaua parĩkatxi ãki. Teoso sikakiti atemoni ãtião. !Aparĩkauata Teoso sikakiti aãpakapini ãkapani, iuaritika isikaua aãuini ãtipirika inini ãkapani, kotxi aãuĩte Xesosi Kristo ipina ate ãkapani.

Tanirauatakaro Atoko Atxa

7 ¹Nitariakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ²Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴Nitariakori, oa sito atokotxikana ate amakinika. Kristo ipina ate īkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori atxaua, ininiā erekari akama Teoso īkapani. ⁵Mitxi anireēkiti maerekati paniātaua maerekati akamini. Aīto nirekari maerekatinoa ikamini, kotxi paniātakori iōkatsopatakori txari: “Kona hīkamapiri maerekati.” Ininiā iusaaki apiata anirekari maerekati akamini, kotxi maerekatinoa kamakani atxaua. Ininiā apina, ininiā kona aāupika Teosokata. ⁶Mitxi paniātakori iōkatsopatakori nirekari ipaniātiniua. Uatxa paniātakori iōkatsopatakori na paniātaikaua. Ikara kitxakari. Uatxa amaneri, kotxi uatxa aparīkauata Teoso īkapani. Erekari Matamatakoti oerekaua aparīkauatini Teoso īkapani.

Teoso Paniātakiti Iōkatsopatakori

⁷Ininiā natokopa itxa uatxa axinikakiti? Teoso paniātakiti iōkatsopatakori maerekati itxaua atxiīti? Konapitini. Maerekati !itxaua. Teoso paniātakiti iōkatsopatakori mauakanimako, nota !imarotamariko maerekati nikamini. Teoso paniātakiti iōkatsopatakori txari:

Kona pinirekapiri āti nakiti,
ininiā āti nakiti ninirekiniā, nimarotari nikaminiri maerekati.
⁸Maerekati xika na nota nirekari ikara Teoso paniātakiti nikamini. Ininiā iteene ninirekari apanakini nakiti. Ninirekari apanakini nakiti, kotxi Teoso paniātakiti iōkatsopatakori txari:

Kona pinirekapiri āti nakiti.
Teoso paniātakiti iōkatsopatakori mauakaniā, iusaaki maerekati !auari. ⁹Teoso paniātakiti iōkatsopatakori nimimarotakanisaaki, na

nimarotari maerekati nikamini. Niuākatari nākixinire auāki inini. Teoso paniātakiti iōkatsopatakori nimarotakasaaki, nimarotari maerekati nikamini. Iuasaaki nimarotari nipinini nimaerekani xika. ¹⁰Iuasaakipeka nimarotari nākixinire ipīkari atoko inini. Teoso paniātakiti iōkatsopatakori oerekari kākiti erekari ikamini, iua auini īkapani. Txamari Teoso paniātakiti iōkatsopatakori oerekano nota nipinini nimaerekani xika. ¹¹Maerekati ninireēkiti misirienetano. Imisirienetano, ininiā na nikamari Teoso paniātakiti iōkatsopatakori iaōka. Ininiā nikamari maerekati. Ininiā maerekati xika nipina.

¹²Teoso paniātakiti iōkatsopatakori !auari maerekati, kotxi Teoso kamari. Atāonoka itxa Teoso paniātakiti. Erekari. ¹³Atxiīti erekari txīkitakano nipinini? Konapitini. Maerekanitxi txīkitakano nipinini. Maerekanitxi txīkitakano Teoso paniātakiti iōkatsopatakori erekari nimakamakani, ininiā nikamari maerekati, ininiā iua maerekanitxi txīkitakano nipinini. Ininiā aimarotari maerekanitxi kona xatiki apakata. Maerekatinoka, kotxi maerekanitxi txīkitakano nipinini. Teoso paniātakiti iōkatsopatakori oerekaua ikara atoko inakari.

¹⁴Aimarotari Teoso paniātakiti iōkatsopatakori iaxiti īkari ininiua. Txamari nota uaikirino. Maerekanitximoni vētxitakori atoko nitxaua, maerekanitxi nitiri atoko nininiua īkapani. ¹⁵Na nimarotari nikamakiti, kotxi na nikamari notaka nireēkiti. Nikamari nimanirekakiniti, nomanatakiti. ¹⁶Ininiā maerekati nimanirekakiniti nikamakasaaki, iuasaaki nimarotari Teoso paniātakiti iōkatsopatakori ereka inini. ¹⁷Ininiā na notani kamari maerekati. Maerekati nākixinireē auakarira txīkitakari nikaminiri iua maerekati. ¹⁸Nimarotari erekari !auari nākixinireē. Maerekatinoka aua nākixinireē, kotxi ninirekari erekari nikamini, txamari !niposotari. ¹⁹Na nikamari erekari ninireēkiti. Nikamapikari maerekati nimanirekakiniti. ²⁰Ininiā nimanirekakiniti nikaminiā, kona notani kamari. Maerekati nākixinireē auakarira txīkitakano iua maerekati nikamini.

²¹Ininiā ia sākiretxiti atāo: Ninirekasaakiri erekari nikamini, maerekatinoka niposota nikamini. ²²Nākixinireē iteene ninirekari Teoso paniātakiti iōkatsopatakori iaōka nikamini. ²³Txamari aua āti ninireēkiti niīto āki. Iua niīto nireēkiti nirekari ixipokiniri nākixinire nireēkiti. Iua niīto nireēkiti xika nikamari maerekati nireēkitinoka. !Niposotari erekari nikamini. Kateia āki iaxirikakoni atoko nitxa. ²⁴!Erekano nota. Maerekati kamakarino nota. Kipa makatxakano, maerekati niīto nireēkiti nimakamakani īkapani?

Niïto txĩkitakano nipinini. Kipa moianatano? ²⁵Aãũite Xesosi Kristokara moianatano. Iuara makatxakano nimapinakani ĩkapani. Peerekari Teoso, kotxi iua kamari ikara atoko nota ĩkapani.

Ininiã uatxa ia atoko inakari nisãpiretai. Nãkixinireẽ ninirekari Teoso paniãtakiti iõkatsopatakori nikamini. Txamari niïtoã maerekanitxi nireẽkitinoka niposota nikamini.

Erekari Matamatakoti Txĩkitakari Aãkixinire Auãki Inini

8 ¹Ininiã uatxa Teoso !itxaikaua ate: “Maerekati hĩkamakiti xika nimisiritaike hĩte,” !itxaikaua ate, kotxi Kristo Xesosi nakitiakori atxapekaua. !Akamaikari aïto nireẽkiti. Erekari Matamatakoti sikaposotiiretaua iua nireẽkiti akamini. ²Erekari Matamatakoti nireẽkiti akama, ininiã iua txĩkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireẽkiti nikamini, ininiã na nipina. ³Aïto maerekani xika Teoso paniãtakiti iõkatsopatakori !iposotari imakatxakiniri amaerekani, kotxi !aposotari akaminiri iua paniãtakiti. Iuaritika Teoso makatxakari amaerekani, kotxi iua iokanitari imi atemoni. Imi ãto ate ãto atoko, maerekati kamakari ãto atoko itxa. Teoso iokanitari imi atemoni ipinini ĩkapani, amaerekani imakatxakini ĩkapani. Ininiã ixipokari maerekati posotiire aïtoã auakari. ⁴Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ĩkapani, kotxi ipaniãtakiti atão inakarinoka. Ininiã !akamaikari maerekati aïto nireẽkiti. Akamari Erekari Matamatakoti nireẽkiti.

⁵Ïtotxi nireẽkiti kamakani xinikapikari iïtona nireẽkitinoka. Erekari Matamatakoti nireẽkiti kamakani xinikapikari Erekari Matamatakoti nireẽkitinoka. ⁶Kãkiti xinikiniãri iïto nireẽkitinoka, ixinikakiti txĩkitakari iua ipinini, ininiãkara kona auapika Teosokata. Kãkiti auiritiniãri Erekari Matamatakoti txĩkitakiniri ixinikiniri Erekari Matamatakoti nireẽkitinoka, iua auapininiika Teosokata. Erekaxinireri iua. ⁷Kãkiti xinikiniãri iïto nireẽkitinoka, Teoso mokaiakariakori itxauana, kotxi !nirekarina Teoso paniãtakiti iaõka ikaminina. !Iposotarina Teoso paniãtakiti iaõka ikaminina. ⁸Ïtotxi nireẽkitinoka kamakani !iposotari ikamapoxokonitirina Teoso.

⁹Hĩtepekana, Erekari Matamatakoti hãkixinire auiniã, hĩkamari iua paniãtakiti. !Hĩkamari maerekati hiïto paniãtakiti. Erekari Matamatakoti kãkiti ãkixinireẽ mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰Hiïto

ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakarinoka ate ikapani. ¹¹Teoso ōkitikari Xesosi, iua ipīkasaaki. Erekarī Matamatakoti Teoso nakiti hākixinireē auiniā, Teoso Kristo ōkitikakarī, txīkitakariko hīto ipinakari iuaīkana auāki inini, kotxi Erekarī Matamatakoti Teoso nakiti aua hākixinireē.

¹²Ininiā nitariakori, auapitika akamakiti tīkane Teoso ikapani. !Auari akamakiti tīkane aito nireēkiti akamini ikapani. ¹³Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekarī Matamatakoti maerekati hīto kamakiti ixipokini, iuasaaki hāupika ātipirika Teosokata.

¹⁴Erekarī Matamatakoti nireēkiti kamakani, Teoso anaakori itxauana, kotxi Erekarī Matamatakoti Teoso nakiti. ¹⁵Iua Erekarī Matamatakoti Teoso sikakiti hitemoni. !Itxīkitakai nitiritxi kapīkareri hininiua. Itxīkitakai Teoso anaakori hininiua. Erekarī Matamatakoti posotiireē aākiritari aīri Teoso: “Papai, niri,” atxari. ¹⁶Erekarī Matamatakoti sāpiretaua aākixinireē Teoso anaakori aniniua. ¹⁷Teoso anaakori aniniāua, aāpakapariko erekarī Teoso nīkatakiti ate ikapani. Kristo apakapari erekarī Teoso nīkatakiti iua ikapani, ininiā ate apakapari iuakata. Kristo misiritaākapeka. Ate misiritiko apaka auiniā Kristo sākire aāuikini xika, Kristo ikinimane auite inakasaakiua, ate apaka aua iuakata iuasaaki. Aātamatari iua iotximere. Peerekari iuasaaki iuakata aāuini.

Aāpakapariko Ikinipoko Erekarī

¹⁸Uai itixi aāuakasaaki, aātatsiirauata. Eereka !axinikaikari mitxi aātatsiirauatini, kotxi Teoso oerekauako ikinipoko erekarī. Iuasaaki peerekari. ¹⁹Ikinipoko Teoso kamakiti iātapari ipoxokoniritika Teoso keto ōti. Iuasaaki aimarotari Teoso anaakori. ²⁰Kotxi ikinipoko Teoso kamakiti misiritaākapeka, ixipokaāpotini tīkane. Ikinipoko Teoso kamakiti ixinireka !ixipokaāpota. Teoso txīkitakarī ikinipoko xipokaāpotini. Iuaritika aimarotari, ipīkitxi xipokini ōti apokapitikako. ²¹Ikinika Teoso kamakiti iātapari iua ōti. Iuasaakiko itixi amaneri itxauako. !Ixpokaika. Iuasaaki ikinika amaneri. !Ixpokaika. Teoso anaakori misiritiko !uaika. Peerekari iuasaakiko.

²²Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³Na itixi Teoso kamakitanini atatsiirauata. Aākixinire apaka akiripireta, kotxi anirekarī Teoso keto

apokini. Iuasaaki iua apakapaua ate iua anaakori. Iuasaakiko aïto amaneri isikaua. Iuasaakiko aïto !kaxiporeikari. Merepanika Teoso sikakiti auapeka atemoni, kotxi iua sikapekari Erekarî Matamatakoti atemoni. ²⁴Teoso makatxakapekari amaerekani, aãuikasaakiri isãkire. Ininiã aiãtapari apikomoni isikaenetakiti atemoni. !Aãtamatanpanikari isikaenetakiti, ininiã aiãtapapanikari. Aãuikapitikari isikaenetakiti isikiniua, ininiã atão aãuikiniri. ²⁵Aiãtapari aãpakapakiti tïkane. !Aãpakapanikari, iuaritika aiãtapari apoxokoniritika, kotxi aimarotapitikari ikara apokini.

²⁶Erekarî Matamatakoti moianataua, kotxi na kataparaxinireua. !Aimarotari aamanaãkiti tïkane, Teoso amisãkiretakasaaki. Iuaritika, Erekarî Matamatakoti misãkiretari Teoso ate ïkapani. Asãkireẽ !aposotari asãpiretiniri Teoso ikinika anireẽkiti, ininiã Erekarî Matamatakoti misãkiretari Teoso ate ïkapani. Ipinimoni itxa isãpiretiniri Teoso. Kãkiti sãkireẽ !isãkirauata Teosokata. ²⁷Teoso imarotari kãkiti ãkixinire, ininiã iua imarotari Erekarî Matamatakoti xinikakiti, kotxi Erekarî Matamatakoti misãkiretari Teoso, Teoso nakitiakori ïkapani. Erekarî Matamatakoti amanaãri Teoso, Teoso nireẽkiti ikaminana inakitiakori.

Teoso Iteene Tiretiniua

²⁸Aimarotari ikiniõtika erekarî ikaminaua ate, kotxi iua tirketani, iua mereẽkini atxaua ate. Iuaritika aãtatsiirauatini auapitika. Iuaritika iuasaaki apaka erekarî ikaminaua. Iua mereẽua, kotxi inirekarî imereiniua. ²⁹Itixi kamiko apisapanika Teoso imarotapekuaa ate. Iua mereẽpekuaa ate, iua anaakori kaiãopokori aniniua ïkapani. Imereẽpekuaa, imi Xesosi atoko aniniua ïkapani. Ininiã Xesosi aïtari apiari. ³⁰Teoso akiritana imereẽkini. Apaka ikamaerekatana iua mereẽkini. Apaka itanapoko erekarî isika ninoa ikamaerekatakinimoni.

³¹Teoso kamari ikinipoko ikara erekarî ate ïkapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. ³²Teoso sikari ikinipoko atemoni. Imi apaka isika atemoni, kotxi ipina ate akinika ïkapani. Isikari imi atemoni, ininiã aua atxiïti iua masakakiniti atemoni? !Auari. Ikinipoko erekarî isikapitikaua atemoni. Ikarone !auari. ³³Aua atxiïti Teoso mereẽkini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. ³⁴Aua atxiïti Teoso mereẽkini misiritiko sãpiretakari? !Auari. Kotxi Kristora

misäkiretari Teoso ate ïkapani, kotxi Teoso ikikomoni auakari itxaua. Iua ipina ate ïkapani, ininiã eereka Teoso õkitikari iua, auapika inini ïkapani. Iuara misäkiretari Teoso ate ïkapani. ³⁵Ininiã kipa atxiiti iotokakatarì Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkori auakasaaki, Kristo tiretapanikaua. Neenamatzì auakasaaki, Kristo tiretapanikaua. ³⁶Teoso sãkire iõkatsopatakori txari:

Pisãkire aãuikini xika, pamonõkoniri ikiniõtika. Aõkiko monõkoni auapika. Soti auite apanakini okini atoko, apanakini nirekari okiniua ate,

itxa Teoso sãkire iõkatsopatakori. ³⁷Maerekati ikara atoko aua, iuaritika iteene akãiata, kotxi atiretakiri sikataparataua. ³⁸Ia nimarota. Kristo tiretiniua iotokakakari !auari. Apĩkasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. Ìkorasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aãuite Kristo Xesosi oerekaua Teoso iteene tiretiniua.

Teoso Mereëna Xoteoakori Inakitiakori Ìkapani

9 ¹Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireë nimarotari nisãkire atão inini, kotxi Erekarì Matamatakoti oerekari nisãkire atão inini. ²Ia nisãkire atão. Iteene nimatinaniuatapika. Nãkixinireë maerekaxiniretinoka nitxa, ninirimane Kristo sãkire mauikakani xika. ³Ninirekamari Teoso misiritinino nota, ninoa nitariakori imamisiritakani ïkapani. Ninirekamari Kristo manirekakanino nota, ninirimane Kristo nakitiakori ininiua ïkapani. Niposotiniãri ikara atoko nikamini, nikamari ninirimane ïkapani. Txamari !niposotari. ⁴Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isãpiretana ninoa ikamaenetakiti ninoa ïkapani. Isikari ipaniãtakiti iõkatsopatakori ninoamoni. Oerekana ninoa kiiniri atão ikaminina,

iuakata isãkirauatakasaakina. Teoso sãpiretana ninoa ikamakiti tĩkane ikinimane kãkiti ĩkapani. ⁵Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniãkasaaki, ninoa apiko mekaniri itxaua, iuaritika Teoso itxaua. Ikinimane auĩte itxaua. “Peerekai,” matxari iua ãtipirika. Ameẽ.

⁶Atxiĩti Teoso kona kamari ikamaenetakiti Isaeo apika mekaniriakori ĩkapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana. ⁸Teoso sãpiretari Isaki auini, iua auini apisapanika. !Isãpiretari ãti Apraão ãkiri Isimaeo inakori auini, iua auini apisapanika. Isimaeo iponaniã, kotxi Apraão sirĩka Isimaeo inorokata. Ininiã kãkiti Isimaeo atoko, Teoso anaakori !itxauana. Teoso sãpiretari Apraão iua keene inini, ininiã isikaenetakininoka atão Apraão apika mekaniriakori itxauana. ⁹Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

¹⁰Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. ¹¹⁻¹²Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako. Ininiã Teoso mereẽri iua eereka iponaniãkari Xakoo inakori apiari inini ĩkapani, iua auini apisapanika. Ininiã na Xakoo kamakitini txĩkitakari Teoso mereiniri iua. Teoso mereẽri iua, kotxi inirekari ikara atoko inini. ¹³Teoso sãkire iõkatsopatakori txari:

Xakoo nitireta. Isaoo nomanata.

¹⁴Ikara atoko ininiã, kanatokopa itxa axinĩkakiti? Atauako Teoso na kamari erekari? Ikamapitikari erekari. ãtipirika Teoso kamari erekari. ¹⁵Teoso txari Moisesi:

Ninirekiniãri ãti niamonĩkini, niamonĩkari. Ninirekiniãri ãti nimoianatini, nimoianatari.

¹⁶Ikara atoko ininiã, anireẽkiti !itxĩkitakari Teoso mereiniua. Akamakiti !itxĩkitakari Teoso mereiniua. Imereẽua, kotxi iamoniãkaua. ¹⁷Teoso txari Paraoo isãkire iõkatsopatakoriã:

Nota txĩkitakai auĩtetxi pininiua, niposotiire noerekini ĩkapani, niuãka ikini itixiti auakani imarotini ĩkapani,

itxa Teoso sākire iōkatsopatakori. ¹⁸Ininiã Teoso nirekiniãri iamoniñinari ãti, iua amoniñkari iua. Apaka inirekiniãri, itxikitakari ãti ãkixinire kaikoxinire inini, Teoso nireẽkiti imanirekakani tĩkane.

Teoso Omanãkare,

Iamonĩkare Pakini

¹⁹Atxiĩti hĩte txano nota: “Teoso ikara atoko ininiã, na ate xikani kaikoxinireua ate. !Aposotari akaminiri Teoso manirekakiniti,” atxiĩti hĩtxano. ²⁰Txamari !apakata ia atoko hinini. Kiriparai hĩte ikara atoko ina sãkiretakani Teosomoni? Kãkiti hĩtxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hĩkamakirimoni. ²¹Hĩxinikari kiki tiitxi kamakari. Ikamari inireẽkiti. Atxiĩti ãti poriĩ katsariã, ikamari ipi kopiti. Atxiĩti ianaka ikamari ãti kopiti, peereri inini, kiiniri ãkapani. Atxiĩti ãtipekana ikama patimari poião ereri, ikiniõtika iãriã iãtiko ãkapani.

²²Ikara atoko itxa Teoso kaminiri kãkiti. Teoso kamari apanakini kãkiti Teoso omanãkare imarotinina ãkapani imaerekanina xika. Iuusaaki oerekana iposotiire imarotininina ãkapani. Teoso omanatana ninoa, iuaritika imĩteenekana. Kona uatxa ixipokana ninoa. Txamari iketo manapi ixipokanako ninoa. Uatxa imĩteenekapanikari ninoa maerekani. ²³Apaka ikamari apanakini iua amoniñkakini. Uatxa imĩteenekari iua omanatakini maerekani, kotxi inirekari iua amoniñkakini imarotininiri iua ereka inini, kotxi peerekari iua. Iteene itiretari iamoniñkakini. Ikamana ninoa erekari isikakiti apakapininina ãkapani. ²⁴Hĩte, ate pakini, iua amoniñkakini atxaua. Iua akiritakini atxaua. Na Xoteonanini akirita. Akiritana Xoteo minakanuia apaka. ²⁵Teoso sākire iōkatsopatakori, Oséia iōkatsopatakitiã, Teoso sãpiretari ikara. Itxari:

Kãkiti mitxi nota nakitiakori minakonimoni nitxako: “Uatxa nota nakitiakori hĩtxapekauako.” Ninoa mitxi nimatiretakinitimoni nitxako: “Uatxa nota tiretakini hĩtxapekauako,” nitxako.

²⁶Mitxi Teoso txana ninoa: “Na nota nakitiakorini !hĩtxaua.”

Ikara Teoso sãkiretiniãtaã, iuaãtaãtxikana: “Teoso ãtipirika auãki inakari anaakori hĩtxaua,” inaãka ninoamoni, itxa Teoso sākire iōkatsopatakori.

²⁷Apaka Teoso sākire iōkatsopatakoriã, Isafã txari:

Isaeo apika mekaniriakori kaiãopokori, potxoari uiniti
kipatxite atoko itxana, txamari poiãonoka makatxakaãka
imapinakani ïkapani.

28 Patimari Teoso xipokiniri iparïka imisiritiniri kãkiti
imaerekani xika,
itxa Isaía. 29 Mitxipeka Isaía txari:

Apiananiri kaposotiireri nïkatari apanakini aãpika
mekaniriakori imapinakani ïkapani. Ininiã atenape
auapanika. Teoso manïkatakanimauako, axipokapiimako
kãkiti Sotoma sitatxiti auakani xipokini atoko, kãkiti
Komoha sitatxiti auakani xipokini atoko atxapiimako,
itxa Isaía sãkire.

Xoteo Mauikakaniri Teoso Sãkire

30 Ininiãkara aimarotari ia: Xoteo minakaniua manitakanisaakiri
Teoso txïkitakinina atão inakari kamakani ininiuana, iusaaki Teoso
txïkitakana atão inakari kamakani ininiuana, kotxi auikarina Teoso
sãkire. 31 Txamari Xoteoakori nitaãpotari paniãtakori ninoa atão
inakari kamakani txïkitakakari, txamari !apokarina. 32 Kinirepa
!apokarina ikara? Kinirepa Teoso na txïkitakana ninoa atão inakari
kamakani ininiuana? Kotxi !auikarina isãkire. Inirekarina iparïkana
txïkitakinina atão inakari kamakani ininiuana. !Inirekarina
auikinirina Xesosi sãkire. Ninoamoni Xesosi kai kimapori nopini
auakari atoko itxa, kotxi kai xika kãkiti mãkitita. 33 Teoso sãkire
iökatsopatakori kitxakapirïkari sãpiretari ia kai pirena. Itxari:

Pikenakotariko ia: Nota iokanatakiti kãkitimoni kai atoko itxa.
Nitakari iua kai Sião sitatxitiã Xoteoakori kimaporeẽ. Iua
kai xika kãkiti mãkitita. Iua kai xika kãkiti irika. Iuaritika
iua sãkire auiãkani lipëtauata nota apisatoõ.

10 1 Nitariakori, nãkixinireẽ iteene ninirekari Teoso makatxakiniri
nininiriane maerekani, Isaeo apika mekaniriakori maerekani.
Nimisãkiretari Teoso ninoa maerekani makatxakiko ïkapani.
2 Nimarotari ninirimane iteene nirekiniri iparïkauatini Teoso ïkapani.
Txamari ninoa kerokari, kotxi !imarotarina atão iparïkauatini Teoso
ïkapani. 3 !Imarotarina Teoso txïkitakiniri kãkiti atão inakari ikamini.
Ninoaka nirekamari atão inakari ikaminina, Teoso apakapinina
ïkapani. Ininiã !auiritarina Teoso txïkitakinina ninoa atão inakari
ikaminina. 4 Kristo kamari ikinipoko Teoso paniãtakiti iökatsopatakori

iaõka, ininiã iuanoka txĩkitakari ikinimane kãkiti iua sãkire auiãkani atão inakari ikaminina.

Apiananiri Akiritakani

⁵Kitxakapirĩka Moisesi sãpiretari atão inakari akamini Teoso paniãtakiti. Iuasaaki itxari:

Ikinika Teoso paniãtakiti iõkatsopatakori ikiniõtika pikaminiã, pauapininiika pitxako, itxa Moisesi sãkire. ⁶Txamari !aposotari ikara atoko akamini. Aãuikasaakiri Xesosi sãkire, iua txĩkitakaua atão inakari akamini. Ininiãkara !apakata pãkixinireẽ pixinikiniri: “Kipa atxiĩti posotari iaxiti apiko nopinixitimoni isini, Kristo notamoni iminini ikapani?” ⁷!Apakata pãkixinireẽ pixinikiniri: “Kipa atxiĩti posotari ipĩkani auiniãtaã isini, Kristo notamoni iminini ikapani?” ⁸Xesosi sãkire auape hĩtemoni. Na hĩsa ãtiãtaã iua sãkire himarotini ikapani. Hinamaãpekari. Hãkixinireẽpekari. Xesosi sãkire auikiko asãpiretapikari kãkiti. Ia atoko asãpiretari kãkiti: ⁹Pinamaã, “Xesosi niauĩte” pininiã, pãkixinireẽ pauikiniãri Xesosi ipinini Teoso õkitikiniri iua, iuasaaki pimaerekani makatxakaãkako. ¹⁰Kotxi aãkixinireẽ Xesosi sãkire aãuikiniã, ikamaerekataua. Anamaã “Maerekati kamakarino nota,” aniniã, iua makatxakari amaerekani. ¹¹Teoso sãkire iõkatsopatakori txari:

Iua sãkire auiãkari pẽtauatini !auari.

¹²Iua Kristo sãkire auiãkari atxiĩti Xoteo itxaua. Atxiĩti Xoteo minakatua itxaua. Xoteo auĩte itxaua Kristo. Xoteo minakanua auĩte apaka itxaua. Ikinimane auĩte itxaua Kristo Apiananiri. Isikari itanapoko erekari ikinimane iua akiritakanimoni. ¹³Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imaktxakini ikapani, iuasaaki imaktxakaãkako imaerekanina.

¹⁴Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasãpiretakonisaakina?

¹⁵Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶Txamari na ikinimane kãkitini auikari Teoso iokanapirena erekari. Kotxi kitxakapirĩka Isafa txari:

Apiananiri, asãpiretamari piokanapirena kãkitimoni, txamari
!auikarina,

itxa Isafa. ¹⁷Kãkiti kenakotakasaakiri Teoso iokanapirena, Teoso txĩkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸Txamari nota pimaãi: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari:

Iaxiti apiko nopinixiti auakari oerekari Teoso ikini itixiti auakani.

Teoso sãkire atoko itxa iaxiti apiko nopinixiti auakari oerekakiti.

¹⁹Iuaĩkana nipimaãi: “Atauako Xoteo limarotari Teoso iokanapirena?”

Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã
nitxĩkitakaiko hĩte hĩxikotinina ninoa mitxi
nota nakitiakori minakaniua. Nitxĩkitakai hĩte
homanãkarauatini, ninoa mitxi mimaroreni xika.

²⁰Isafapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Nimotika nota makiritakanimoni.”

²¹Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri ninoa kanapiriini
notamoni, txamari !ikĩpitarina nisãkire. !Ikamarina
nisãkire iaõka. Inireẽkitinoka ikamana.”

Xoteo, Teoso Sãkire Auiãkani

11 ¹Ininiã nipimaãi: “Atauako Teoso !nirekaikari Xoteoakori?”
Inirekapitikana. Nota apaka Xoteo nitxaua. Apraõ
apika mekaniri nitxaua. Pẽxamiĩ apika mekaniri nitxaua. ²Teoso
!ltakanapari Xoteoakori. Iua mereẽna ninoa itixi kamiko apisapanika.
Himarotari Teoso sãkire iõkatsopatakori, Eriasi tsoatakasaaki
Teosomoni Xoteo maerekani isãpiretakasaaki. ³Iusaaki Eriasi txari:
Apiananiri, ninoa okapekari kãkiti pisãkire sãpiretakani.
Ikpirinikarina amesa pinakiti pitemoni sikakori
takikoãtaã. Notanoka pisãkire sãpiretakarino auapanika.
Ninoa asikatikinitano nota okinino !kapani,

itxa Eríasi. ⁴Kanatokopa Teoso apakapapiretari Eríasi? Teoso txari: Kona pitenanini auikari nisákire. Nota nīkatari setxi mio kikiakori nota nakitiakori. Ninoa kona teosonetari kākiti kamakiti Paa inakori. Kona ikapotoreēkauana iua apisatoō, Teoso txari Eríasi. ⁵Ikara atokotxikana uatxa. Aua apanakini kākiti Teoso mereēkini. Imereēna ninoa, kotxi iua nirekari ikinipoko erekari ikaminina ninoa. ⁶Maerekati kamakani kākiti, iuaritika Teoso mereēua ate. Isikari ikinipoko erekari ate ikapani maxikatiīka. Aparīka litxīkitakari iua sikiniri ikinipoko erekari atemoni. Aparīka txīkitakiniāri ikinipoko erekari isikiniua, ininiā kona maxikatiīka isikarauata atemoni.

⁷Ininiā kanatokopa atxa asákire apikomoni? Xoteoakori kona apakapari inireēkitina. Inirekarina Teoso apakapinina ninoa erekarini ininiuana. Teoso mereēkininoka apakapari ikara inakari. Apanakinipekana Teoso laurita atāo imarotinina. Mōsiāreni atoko itxana. ⁸Teoso sákire iōkatsopatakori txari:

Teoso txīkitakari ninoa ākixinire imakakari atoko inini, iua sákire imimarotakanina ikapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !nirekarina Teoso sákire ikīpitinina. Uatxapiima ikara atoko itxapanika,

itxa Teoso sákire iōkatsopatakori. ⁹Kitxakapirīka Tavii txari Teosomoni: Ninoa kiena kaiāopokori. Inipokotakasaakina, iuākatarina pite apokaerekatina ninoa, kotxi kaiāopokori ikienana. Ikienana takapiri atoko itxa imaīkinina ninoa. Itxīkitakana ikerokinina. Ikara xika ninirekari pimisiritinina.

¹⁰Ninirekari ninoa mōsiāreni atoko ininiuana, ininiā na atāo atamatarina pikimapore. Kākiti tiitxi minari porikitakani atoko pitxīkitakanako ninoa ātipirika, itxa Tavii sákire.

Xoteo Minakaniua Maerekani Makatxakiko

¹¹Iuaīkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiākara Teoso sápiretari Xoteo minakaniua imaerekanina imakatxakini, Xoteo xikotinina ikapani, iuaīkana Teosomoni ikanapiriinina ikapani.

¹²Xoteoakori kamari maerekati, ininiākara Teoso sikari erekari kiīkiri apanakini itixi auakanimoni. Xoteo mapakapakiniti Xoteo minakaniua

apakapa erekari kiikiri. Ininiã Xoteo kanapiriãkasaaki Teosomoni, iuaaaki apiaerekata Teoso sikakiti kãkitimoni.

¹³Uatxa nota misãkiretai hïte Xoteo minakanuia, kotxi Teoso iokanatano nota hïtemoni isãkire nisãpiretini ïkapani. Niuikari hïtemoni niokanatiko. ¹⁴Ikara atoko ininiã, atxiïti ninirimane Xoteo xikotai hïte, ininiã atxiïti apanakini ninoa kanapiriã Teosomoni, imaerekanina Teoso makatxakini ïkapani. ¹⁵Teoso takanapakasaakiri Xoteo, iua apakapari Xoteo minakanuia, ininiã ninoa Xoteo minakanuia kanapiriã Teosomoni. Teoso iuaïkana apakapakasaakiri Xoteoakori, iuaaakiko peerekari. Ipïkani iuaïkana auãki inini atoko itxako.

¹⁶Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. ¹⁷Xoteoakori oriva mina takakori atoko itxa, takakori Teoso nakiti. Åtikaka ipori kapatakaãka. Oriva ïtopakiri pori apaãka. Iapitaka inaãka ikapatakikoãtaã. Aneẽ takari katiã. Takari sikakienatari ïtopakiri pori. Hïte Xoteo minakanuia iua oriva ïtopakiri pori atoko hïtxaua. Hãpakapari Teoso sikakiti, kotxi hïte apotiitaua Xoteoakorikata, Teoso nakitiakorikata. ¹⁸Hïte Xoteo minakanuia, kona hïuikapeua Teoso apakapini hïte. “Iua aãpori kapatakiko atoko, Teoso takanapana Xoteoakori, ate apakapini ïkapani,” kona hïtxape, kotxi aãpori atoko hïtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hïte apakapari Teoso sikakiti, kotxi hãpotiitaua Xoteokata.

¹⁹Atxiïti hïte Xoteo minakanuia txano nota: “Iua aãpori kapatakaãkori atoko Teoso takanapari Xoteoakori. Åti aãpori iapitakiko atoko, Teoso apakapaua ate,” hïtxano atxiïti.

²⁰Atãopitikara. Teoso takanapari Xoteoakori, kotxi ninoa !auikari isãkire. Iua apakapai hïte, kotxi hïte auikari iua sãkire. Iuaritika !hïuikapeua ikara atoko hinakasaaki. Erepaniko. ²¹Teoso takanapari Xoteoakori, takari pori sauakakori atoko. Ininiã erepaniko, kotxi ïtopakiri aãpori atoko hïtxaua. Atxiïti åti õti okanapai hïte apaka.

²²Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki. Itiraõki himanirekakaniã, hïte apaka mapara hõkaãka, iua aãpori sauakakori atokokana. ²³Xoteo takanapiniãri imauikakaniri Xesosi sãkire, auikiniãri iuaïkana isãkire, Teoso iuaïkana mikanapiriãna, kotxi Teoso kaposotiireri ikara atoko ikamini.

²⁴Hĩte ĩtopakiri pori sauakakori takarimoni iapitaãkori atoko hĩtxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaĩkana Teoso takinina ninoa, iuaĩkana imikanapiriinina ninoa iuamoni.

Xoteo Maerekani Makatxakaãkapanikako

²⁵Nitariakori ninirekari himarotiniri apanakini mimarotakiniti, ininiã na hĩuikaua. Xoteo !nirekari auikiniri Teoso sãkire uatxa, iuaritika na ikara atoko !itxapani ãtipirika. Ikini itixiti auakani Teoso nireẽkini Xoteo minakaniua kanapiriãkasaaki Teosomoni, iuasaakiko Xoteo kanapiriãko Teosomoni. ²⁶Ininiã iuasaaki ikinimane Xoteo kanapiriãko Teosomoni. Iuasaaki Teoso makatxakari ninoa maerekani. Teoso sãkire iõkatsopatakori kitxakapirĩka auakari ikara atoko itxa. Itxari:

Xoteo itxauako maerekanitxi makatxakakari.

Imakatxakariko ikinika maerekati Xoteoakori kamakiti, Teoso manirekakiniti. Iuasaaki Teoso nireẽkitinoka inirekanako.

²⁷Nimakatxakariko maerekati ninoa kamakiti, kotxi kitxakapirĩka nikamaenetari ikara atoko inakari, itxa Teoso sãkire iõkatsopatakori.

²⁸Xoteoakori !nirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hĩte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereẽna ninoa. Apraão, Isaki, Xakoo pakini apika mekaniriakori itxauana, ininiãkara Teoso tiretapanikana ninoa. ²⁹Teoso kona mamakari isãkire. Kãkiti iua mereẽkini ãtipirika iua mereẽkini itxauana. Isiãkiti erekari kãkitimoni !imakatxaka iuaĩkana. ³⁰Hĩte Xoteo minakaniua kitxakapirĩka !hĩkĩpitari Teoso sãkire, iuaritika uatxa Teoso amonĩkai hĩte, kotxi Xoteo kona kĩpitari Teoso sãkire uatxa. ³¹Uatxa Xoteoakori kona kĩpitari Teoso sãkire. Teoso amonĩkapekai hĩte Xoteo minakaniua, ininiã Teoso iuaĩkana amonĩkanako Xoteoakori apaka. ³²Ikinimane kãkiti na kĩpitari Teoso sãkire. Kona aposotari akĩpitiniri Teoso sãkire. Teoso txĩkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonĩkaua.

Peerekari Teoso

33Peerekari Teoso. Atãonoka ikama. Paimatireri iua. Kãkiti !imarotari ikamakiti tĩkane. Kãkiti !imarotari inireẽkiti tĩkane. 34!Kimarotikori Teoso xinikakiti. !Kõtãkikikori Teoso. 35Teosomoni ikinipoko aua, ininiã kipa asika atxiĩti iuamoni? Asikiniri !auari. Ininiã !auari ate nakiti, iuaĩkana Teoso sikiniua ĩkapani. 36Kotxi Teosokara kamari ikinipoko. Ikinipoko aua Teoso posotiireẽ. Ikamari ikinipoko iua ĩkapani. Atipirika matxariko Teoso: “Peerekai pite.” Ameẽ.

Teosomoni Sikakori Auãkiri

12 1Ininiã nitariakori Teoso amonĩkapitikaua. Ininiã nota iteene õtãkikai hĩte. Hĩteka hĩsikaua Teosomoni. Teosomoni sikakori auãkiri atoko hĩtxauako. Ininiã iua nakitinoka hĩtxaua. Ikara atoko hĩkaminiã, Teoso apokaerekatari. Ikara atoko inakari akaminari Teoso, ikara atão. 2!Hĩkamapinikariko Teoso sãkire mauĩãkani kamakiti atoko. Hãuiritariko Teoso txĩkitakiniri hĩxiniãkiti ereka inini, ininiãkara ipinipo hĩtxako. Iuasaakiko himarotari Teoso nireẽkiti. Himarotari Teoso nireẽkiti ereka inini. Himarotari hĩkamakiti tĩkane iua apokaerekatini. Himarotari atão hĩkamini. 3Teoso sikari ikinipoko erekari notamoni, ininiã nisãpiretari iua sãkire hĩtemoni. Ininiã nota õtãkikai hĩte hĩkinika. Na hũikapeua. Hĩteka atão himarotauako. Hĩteka hãtamakauako. Teoso txĩkitakai hãuikiniri isãkire. Iteene hãuikiniãri iua sãkire, iteene hĩteka himarotaua. 4Kãkiti ĩto ãtika, iuaritika ĩtotxiã auakari kaiãopokori. Aua ikanoke, itapike, oki, ikenakoki txaãpota. Ikinika iparĩka aua. Ikanoke parĩka ãtião. Oki parĩka ãtião. Itxaãpota. 5Iua atokokana atxa. ĩtotxi ãtika atoko atxa, iuaritika itoua ate. Kanoketxi, tapiketxi, okĩtxi, kenakokitxi, ĩtotxiã auakari atoko ate. Kristokata aãpotiitaua. Anakititakakaua. 6Nota parĩka Teoso ĩkapani ãtião. Āti parĩka Teoso ĩkapani ãtião. Āti parĩka Teoso ĩkapani ãtião, itxaãpota. Teoso sikari erekari ikininapemoni, ikara iparĩka ikamini ĩkapani. Atxiĩti Teoso sikaimaroretai iua sãkire apanakinimoni pisãpiretini ĩkapani, ininiãkara Teoso sãkire pauikini iaõka pisãpiretari Teoso sãkire kãkitimoni. 7Teoso sikaimaroretiniãi apanakini pimiparĩkatini, ininiã pimiparĩkatariiko apanakini. Teoso sikaimaroretiniãi isãkire poerekini, ininiã poerekarauatako. 8Teoso sikaimaroretiniãi ãti pisikataparaxiniretini, ininiã pisikataparaxiniretariko ãti. Teoso

nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auñtetxi pininiua, ininiā auñtetxi erekari pitxauako. Teoso nirekiniāi apanakini piamonĩkini, ininiā pipoxokoniritika piamonĩkanako.

Tiraõkitxi

⁹Atão pitiretariko apanakini pākixinireẽ. Pomanatariko maerekanitxi. Na piotokakapiri erekari pikamini. ¹⁰Iteene hñtiretakakauako, kotxi Kristo txĩkitakapekuaa añtaritakakiniua. Piteka pipaxitiniua atokokana, apiata pipaxitariko ãti. ¹¹Pitaparaxinireritika piparĩkauatako. Na piarinouatape. Piparĩkauatako Teoso ãkapani pipoxokoniritika pākixinireẽ. ¹²Pipoxokoniatako, kotxi pimarotari Teoso kaminiri ikamaenetakiti. Pimiteenekariko pimisiritiko. ãtipirika pimisãkiretariko Teoso. ¹³Nipokori kaamatiniã pitariakorimoni, tiitxi kaamatiniã pitariakorimoni, auiniã pitemoni, piskanako. Papakapanako pipoxokoniritika ikinimane Xesosi sãkire auĩãkani paapoko apoãkani, ãtiãtaã ãkani.

¹⁴Pamanaãri Teoso erekari ikaminina pite misiritakani. Ari, pamanaãri Teoso erekari ikaminina ninoa. Na pamanaãpiri Teoso maerekati isikinina ninoa. ¹⁵Pipoxokoniatako poxokorinikata. Pitxiapata kaminanirinikata. ¹⁶ãti pitiretini atokotxikana, ikinimane pitiretako. Na piuikapeua. Pisãkirauatako kãkiti matxineirotenikata, katxineiroteni pimisãkiretini atokotxikana. “Kimaroreno nota,” na pitxape.

¹⁷Kãkiti kaminiãri maerekati pitemoni, na pikamapiri maerekati iuamoni. Atãonoka pikama ikinimane ãkapani. ¹⁸Pinirekariko pauini kãkiti sauaki ereka inini, ininiã maxikatĩka kona pitxitapiri ãti. ¹⁹Nitiretakini, na hñxikatxitapiri ãti. Teosora xikatxitariko, kotxi Teoso sãkire iõkatsopatakori txari:

Nota parĩka ãti nixikatxitini. Notara misiritari maerekati kamakari, itxa Apiananiri sãkire. ²⁰Ari, kona pixikatxitapiri ãti. Pikamariko ãtimoni ia Teoso sãkire iõkatsopatakori iaõka:

Pomanatakiri natxitiniã, pisikakienatari iua. Iposonatinã,
 pisikari iãtini. Ikara atoko pikaminiã, ipẽtauata maerekati
 pitemoni ikamini,

itxa Teoso sãkire iõkatsopatakori. ²¹Na paunitapiri maerekati piauñte atoko ininiua. Erekari pikamakasaaki, maerekati iokanatapeẽkaika.

Aãuĩteakori Nirekakiti Akĩpitini

13 ¹Akĩpitarike aãuĩteakori nirekakiti, kotxi Teosora auiritana ninoa auĩtetxiakori ininiuana. Teosora takari ninoa auĩtetxiakori aãuĩteakori ininiuana ĩkapani. ²Aãuĩteakori nirekakiti amakamakaniã, Teoso nirekakiti apaka !akama, kotxi Teoso txĩkitakana ninoa aãuĩteakori ininiuana. Ninoa paniãtakiti amakamakaniã, amisiritaãkako. ³Erekari kamakani !ipĩkari iauĩtena. Maerekati kamakaninani pĩkana ninoa. Pinirekatari pimapĩkakaniri piauĩte? Ininiã erekari pikamako, ininiã iua txaike: “Erekai pite.” ⁴Teoso nitiri itxaua piauĩte, erekari pitemoni ikamini ĩkapani. Txamari maerekati pikaminiã, erepaniko. Pipĩkariko iua, kotxi iposotari imisiritinii. Iua Teoso nitiri itxaua kãkiti maerekati kamakani imisiritini ĩkapani. ⁵Ininiãkara pikamariko piauĩteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pãkixinireẽ ikara atoko atão pikamini.

⁶Piauĩteakori Teoso nitiriakori itxauana, ininiã erekari apaka pisikiniri txineiro ninoamoni iparĩkana ikaminina ĩkapani. ⁷Ininiãkara pĩikitxitana ninoa amanaãkiti, sitatxi pauini ĩkapani, pitii papakapini ĩkapani. Pipaxitanako ninoa. Pikamariko ninoa nirekakiti.

Hĩtiretakiniua ĩkapani

⁸Pĩikitxitariko ikinika piamotakiti. !Erekari pimaĩkitxitakaniri ãti. ãtinoka tẽpito erekari. Ia tẽpito na txineironi. Ia tẽpito atiraõki. Ia atoko inakari tẽpito xipokini kona erekari. ãtipirika hĩtiretakakauako. !Erekari pixipokiniri pitiretiniri ãti. ãti tiretakari kĩpitapekari Teoso paniãtakiti iõkatsopatakori. ⁹Teoso paniãtakiti iõkatsopatakori txari: “!Pisirĩkape pĩtanoro minakotokatika. Na pokaniuatape. Na piĩtiriuatape. Na pinirekapiri apanakini tii.” Akĩpitari ikara Teoso paniãtakiti iõkatsopatakori, apanakini ipaniãtakiti apaka, ia Teoso paniãtakiti ãtika akĩpitiniã. Ia Teoso paniãtakiti paniãtaua: “Piteka pitiretiniua atokotxikana, pitiretariko ãti.” ¹⁰Pitiretiniãri ãti, maerekati !pikaminiri iua. Ininiã ãti pitiretiniã, pikamari Teoso paniãtakiti iõkatsopatakori ikinika.

¹¹Matiretari ãti, kotxi aimarotari kaiamapekari Kristo kanapiriini. Ininiã pimerekako. Kona pimakapeko. Piparĩkauatako Teoso ĩkapani,

kotxi itixine Xesosi anikiniua õti apokaãpotanapanoka. Akokaxiti aãuikari Xesosi sãkire. Uatxa paĩtiki ikanapiriã. ¹²İkanõkari xipokaãpotanapanoka. Pokamara apokaãpotanapanoka Kristo kanapiriãkasaaki. Maerekati ipiãkasaaki kamakori atoko itxa, ininiã maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiã maerekati !imaĩkaua. Pokamarari atoko itxa erekari akamakiti. ¹³Pokamara kãkiti kamari atão inakarinoka apanakini apisatoõ. Makamari ikara atoko inakari ãtipirika. !Erekari kiiniri maerekati akamini. !Erekari apoãtini. !Erekari asirĩkini sito aĩtanoro minakotokatika. !Erekari akaminiri maerekati aĩto nireẽkiti. !Erekari aneenamauatini. !Erekari axikotiniri ãti. ¹⁴Ikara atoko inakari akamini !erekari. Makamari ia atoko inakari: Maamanaãri Apiananiri Xesosi Kristo kapakiniua, sotato mãka paikori sotato ãto kapakini atoko. !Hĩxinikapiri: “Kanatokopa nitxa nikaminiri niĩto nireẽkiti?” Kotxi maerekatinoka aĩto nireẽkiti.

Kona Hĩtaparakienatakapeua

14 ¹Hãuiritariko Xesosi sãkire poiãonoka auĩakari hĩtekata apotiitiniua. Na hĩtxitapiri iua, ixinikakiti na hĩte xinikakiti atoko iminakanisaaki. ²Kãkiti iteene auikiniãri Xesosi sãkire, atxĩiti inikari itanapoko nipokori. ãti kãkiti poiãonoka auikiniãri Xesosi sãkire, atxĩiti inikari takarinoka. ³!Erekari ikinipoko niãkari sãpiretiniri takarinoka niãkarimoni: “Pikerokari” ininiri. Apaka !erekari takarinoka niãkari sãpiretiniri ikinipoko niãkarimoni: “Pikerokari” ininiri, kotxi Teoso apakapapekari iua. ⁴Kinakariparai pite ãti nitiri pinitakarii: “Pikerokari” ãtimoni inakarii. Ikerokiniãri, iua patrãote pinitamariko. Maerekati !ikama, kotxi Apiananiri moianatari iua.

⁵Atxĩiti ãti sãkire: “Ia õti erekari iteene axinikiniri Teoso.” Atxĩiti ãtipekana: “İkiniõtika erekari iteene axinikiniri Teoso.” Hãkixinireẽ hĩxinikariko: “Natokopa itxa atão nikamini?” ininiã eereka atão hĩkamini tĩkane himarotape. ⁶Hĩte: “Ia õti apiaerekata iteene axinikiniri Teoso,” hininiã, ininiã ikara atoko hĩxinika Teoso hĩpaxitini ĩkapani, ininiã erekapitikari. İkinipoko niãkari nikari ikinipoko, Teoso ipaxitini ĩkapani, kotxi apisapanika itxari Teoso: “Erekapitikai ia nipokori pisikinino niniãkiti ĩkapani,” itxari. İkinipoko maniãkati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniãkiti ĩkapani,” itxari. Ininiã iua apaka paxitari Apiananiri. ⁷Kona

ateka auñtetaua. Kona aãua ateka ïkapaninanini. Kona apina ateka ïkapaninanini. ⁸Auapanika anakasaaki, aparïkauata Apiananiri ïkapani. Apïkasaaki, apina Apiananiri ïkapani. Ininiã auapanika anakasaaki, apïkasaaki apaka, Apiananiri nakiti atxaua. ⁹Kristo ipina, eereka ôkitikaua iuaïkana, auapanika inakani auñte ininiua ïkapani, ipïkani auñte apaka ininiua ïkapani. ¹⁰Ininiã !apakata pitxitiniri pitari. “!Kiïkitei,” kona pitxapiri, kotxi akinika aãpokako Teoso apisatoõ. Iuasaaki iua sãpiretariko akamakiti, erekari inini atxiiti, maerekati inini atxiiti. ¹¹Teoso sãkire iõkatsopatakori txari:

Nota Apiananiri, ãtipirika auakari nitxaua. Ikinimane kãkiti kapotoreẽkauako nota apisatoõ. Ikinimane txanoko nota Teoso nininiua.

¹²Ininiã iuasaakiikarako akinika asãpiretari Teoso ikinika akamakiti ïkorapokoriti aãuakasaaki.

Masikataparaxiniretakakaua

¹³Ininiã hïtokakariko hïtaparakienatakakiniua. Hãkixinireẽ hïtxako: “!Nitxïkitakapaniri nitari kerokiniri ikamakiti. !Nitxïkitakapaniriko nitari kaminiri maerekati,” hïtxako. ¹⁴Xesosi Apiananiri nakiti nitxaua, ininiãkara nimarotari, apakatapitika Teoso sãkire auiaãkari nikiniri ikinipoko nipokori, kotxi nipokori maerekati !uari. Iuaritika kãkiti auikiniãri iua nipokori maerekati inini, !apakata inikiniri. ¹⁵Hinikiniãri ikinipoko nipokori, atxiiti hïtari ãkixinire maxirauata, ininiã na atão hïtaretari iua. Kristo ipina iua hïtari ïkapani, ininiã hïtakanapariko iua nipokori hinikini, kotxi atxiiti iua !auikaikari Xesosi sãkire, iua nipokori hinikini xika. ¹⁶Erekari auakasaaki, !hãuiritapiri ãti sãpiretinii ikara erekari maerekati inini. ¹⁷Teoso aãuñte ininiãua, kona nipokorinanini, kona iãtakorinanini, axinika. Teoso aãuñte ininiãua, axinikari Erekari Matamatakoti sikakiti atemoni. Iua txïkitakaua atãonoka akamini. Ikamaerekaxiniretaua. Isikapoxokonitaua. Teoso aãuñte ininiãua, ikara atoko itxa aãuini. ¹⁸Ikara atoko aparïkauatiniã Kristo ïkapani, Teoso apokaerekataua. Kãkiti apaka apokaerekataua.

¹⁹Ininiãkara manirekari kãkiti auini ereka inini, neenamatchi mauakani ïkapani. Masikataparaxiniretakakaua. ²⁰Na himisiritapiri Teoso parïka nipokori xika. Ikinipoko nipokori erekari hinikini, txamari hïte nikakiti txïkitakiniãri ãti takanapiniri Kristo, hïkerokari. ²¹Hïtari kerokiniãri ikamakiti hïte niãkiti xika, apiaerekata

himanikakaniri iua nipokori. Hītari kerokiniāri ikamakiti hīte iātakiti xika, apiaerekata iua iāriā himiātakani. Na xatiki hītxīkitakapiri hītari kaminiri maerekati. ²²Hītemoni ikinipoko nipokori nikiko erekari, txamari na hīsāpiretapiri apanakini. Erekari Teosonoka imarotiniri. Hīxinikasaakiri hīkamakiti atāo inini, hākixinireē himarotakasaakiri hīkamakiti atāo inini, iuasaaki hīpoxokoniuata. Ininiā kona hīteka apoītaua. ²³Hinikasaakiri nipokori, hākixinireē: “Erekari atxiīti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekari. Himauikakaniāri hīkamakiti ereka inini, ininiā maerekati itxaua hīkamakiti.

Āti Nireēkiti Kamiko Pirena

15 ¹Atxiīti ikinipoko Teoso sākire aāuika, ininiā amoiatariko Teoso sākire poiāonoka auīākari, imaposotakiniti ikamini īkapani. !Erekari ateka nireēkitinoka akamini. ²Erekari akaminiri aītari nireēkiti, iua amoiatatini īkapani, Teoso sākire iteene auikini īkapani. ³Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri:

Kākiti misākirepiretakasaakii pite, notara ninoa misākirepireta. ⁴Ikinika Teoso sākire iōkatsopatakori iōkatsopataāka ate oerekiko īkapani. Teoso sākire iōkatsopatakori aāuikasaaki, aiātapari apoxokoniritika erekari apokini. Aimarotari erekari apokapitikako. Teoso sākire iōkatsopatakori sikataparaxiniretaua.

⁵Teoso sikataparataua, ininiā apoxokoniritika aiātapari erekari apokini. Isikataparaxiniretaua. Ninirekari Teoso txīkitakiniri hīte nireēkiti ātinoka inini, Kristo Xesosi nireēkiti iaōka hīkamini. ⁶Erekari hinireēkiti hākixinireē ātinoka inini. Erekari hīsākire ātinoka inini. Ikara atoko hininiā, hīkinika txari Teoso: “Peerekai pite,” kotxi iua aāuīte Xesosi Kristo iri itxaua.

Xoteo Minakaniua Poxokoniuatini

⁷Hāpakapariko āti, Kristo apakapinii atokokana, ininiā kākiti txari Teoso: “Peerekai pite,” txariko. ⁸Nisāpiretai. Kristo Xoteoakori nitiri atoko itxapekaua. Ikara oerekari Teoso sakiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi īkorapokoriti apokasaaki. ⁹Kristo Xoteoakori nitiri atoko itxapekaua, ininiā Xoteo minakaniua txari: “Kaamonīkareri Teoso. Peerekari iua,” itxana. Teoso sākire iōkatsopatakori txari:

Xoteo minakaniua auiniātaã nitxariko Teoso: “Peerekai pite.”

Nixikarauata pite ĩkapani, kotxi peerekai pite.

¹⁰Iuaĩkana Teoso sãkire iõkatsopatakori txari:

Hĩte Xoteo minakaniua hĩpoxokoniuaatoko Xoteoakorikata,
Teoso nakitiakorikata.

¹¹Iuaĩkana Teoso sãkire iõkatsopatakori txari:

Hĩte hĩkinika Xoteo minakaniua, “Peerekari Apiananiri” hĩtxako.

Hĩkinika itixi auakanii hĩxikarauatako Teoso ĩkapani.

¹²Iuaĩkana Teoso sãkire iõkatsopatakoriã Isaía txari:

Auako Xesee apika mekaniri. Xoteo minakaniua auĩte
itxauako. Ninoa imarotariko isãkire iaõka ikamini,

itxa Teoso sãkire iõkatsopatakori.

¹³Teosora txĩkitakai himarotiniri isãkire iaõka ikamini. Ninirekari iua iteene kamapoxokonitini hĩte. Ninirekari ikamaerekaxiniretinii hĩte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekari Matamatakoti posotiireẽ himarotari ikara.

Paoro Teoso Iokanapirena Erekari Sãpiretakari Xoteo Minakonimoni

¹⁴Nitariakori, nota imarotari ereka hinini. Nimarotari hĩte iteene kimarore hinini hõerekakakiniua ĩkapani. ¹⁵Iuaritika ia niõkatsopatakitiã nõtãkikapekai hĩte nitaparaxinireritika. Himarotakiti, iuaĩkana nisãpiretai, iuaĩkana hĩxinikiniri ĩkapani. Teoso sikari erekari notamoni, ininiã ikara atoko niõkatsopata hĩtemoni. ¹⁶Teoso sikari erekari notamoni, kotxi itxĩkitakano Xesosi Kristo nitiri nininiua. Ipaniãtano niparĩkauatini Xoteo minakaniua ĩkapani. Sasetotxi apakapari kãkiti mĩkiti, ininiã sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua. Nisãpiretari Teoso iokanapirena erekari Xoteo minakonimoni, ininiã ninoaka sikaua Teosomoni inireẽkiti ikaminina ĩkapani. Teoso apakapari ikara atoko inakari ninoaka iuamoni sikakaniua. Erekari Matamatakoti kamaerekatari kãkiti Teoso apakapinina ĩkapani.

¹⁷Ininiã Teoso ĩkapani niparĩkauatakasaaki, niuikari Xesosi Kristo. ¹⁸Nota kona iuikaua, kotxi Kristo posotiireẽ Xoteo minakaniua kamari Teoso nireẽkiti. Kristo paniãtano nota iua sãkire nisãpiretinina Xoteo minakaniua. Ipaniãtano inireẽkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireẽkiti. ¹⁹Erekari Matamatakoti posotiireẽ noerekari Teoso takaõtxikare ninoamoni. Noerekari posotiiretxi kãkiti maposotakiniti

ninoamoni. Ininiākara ninoa kamari Teoso sākire iaōka. Kristo iokanapirena erekari ikinika nisāpiretapekari kākiti Xerosareē sitatxiti auakani. Eereka kākiti apikoxiti auakani nisāpireta. Eereka kākiti apikoxiti auakani nisāpireta. Nitxaāpota kākiti nisāpiretini. Imapotōkire Iríría tixinipeka napoka, Kristo iokanapirena erekari nisāpiretini ĩkapani. ²⁰Ātipirika ninirekari nisāpiretiniri Kristo iokanapirena erekari Kristo mimarotakoniātaā. Ininiā kona niparĩkauata Teoso ĩkapani āti parĩkauatiniātaā, kotxi āti sāpiretapekari Kristo iokanapirena kākiti iuaātaā. ²¹Kotxi Teoso sākire iōkatsopatakori txari:

Mitxi iua masāpiretakoni imarotariko iua sākire. Mitxi iua sākire makenakotakani imarotariko iua sākire, itxa Teoso sākire iōkatsopatakori.

²²Kaiōokataikani ninirekamari nisini hĩtemoni, txamari kona apakata, kotxi iuasaaki nisāpiretari Kristo sākire Kristo sākire mimarotakanimoni.

Paoro Seenetini Homamoni

²³Itokanani ninirekamari naōkitinii hĩte. Uatxaika apakata nisini hĩtemoni, kotxi nixipokapekari niparĩka ĩkorapokoriti. ²⁴Nirekari Espánia tixinimoni nisini. Iuaā nisikasaaki, ninirekari naōkitinii hĩte. Ninirekari mapaōti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espániamoni nisini ĩkapani, ininiā eereka Espánia tixinimoni nisa. ²⁵Uatxa hĩtemoni nisini apisapanika, nisa Xerosareēmoni, kotxi ninirekari nanikiniro txineiro kākiti Teoso nakitiakori iuaā auakani nisikini ĩkapani. ²⁶Kristo sākire auiākani, Xoteo minakanuia Masetónia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareē sitatxitiā. ²⁷Ninoa poxokoniuata oa txineiro isikinina Xerosareē auakanimoni. Erekari oa txineiro isikinina, kotxi Xoteoakori Kristo sākire auiākani sikari Teoso sikakiti Teoso iokanapirena erekari Xoteo minakonimoni. Ininiā erekari Xoteo minakanuia sikiniri ipixini itxineirotena Teoso sikakito, Xoteoakorimoni. ²⁸Ininiā oa txineiro nanika Xerosareē auakanimoni. Ninoamoni txineiro nisika atoko, ininiā eereka nipotorika Espániamoni nisini. Espánia napokini apisapanika nisako hĩtemoni. ²⁹Ereē napokasaaki, nisāpiretai ikini sereti erekari Kristo sikakiti hĩtemoni.

³⁰Nitariakori nota amanaāi hĩte, himisākiretiniri Teoso nota ĩkapani. Hĩkenakotatari namanaākiti? Himisākiretariko Teoso nota

ĭkapani. Xesosi Kristo aũũite itxaua, ininiã namanaã himisãkiretiniri Teoso nota ĭkapani. Erekarı Matamatakoti txĩkitakaua atiraõkiuatini, ininiã himisãkiretari Teoso nota ĭkapani. Ikara atoko hĩkaminiã, Teoso sikataparatanı nimisiritiko auakasaaki. ³¹Kristo sãkire mauĩãkani Xotẽia tõpa auakani nirekarı imisiritinino nota. Himisãkiretari Teoso ninoa mamisiritakanino ĭkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakaniua iokanatakito. ³²Ininiã Teoso nirekiniãri, napoka hĩtemoni nipoxokoniritika. Ininiã asikapoxokonitakakaua. ³³Teoso akamaerekaxiniretakiri aua hĩtekata. Ameẽ.

Paoro Akiriuãkaãpotana Ixinikakini

16 ¹Niokanataro aĩtaro Pepi inakoro hĩtemoni. Peerekaro oa. Omoianatana Xesosi sãkire auiãkani Sẽkireia sitatxiti auakani. ²Apiananiri nakito otxaua, ininiã hãpakaparoko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

³Hĩsãpiretanako Pirisira, oĩtaniri Ākira pakini nixinikamanapitinina ninoa. Ninoa parĩkauatapeka Kristo Xesosi ĭkapani notakata. ⁴Okaãkanapanokana nota imoianatinina xika. Peerekana, kotxi erekarı ikaminanona. Xoteo minakaniua, ikini Teoso misãkiretikoãtaã apotiitakaniua apaka imarotari erekarı Pirisira, Ākira pakini kamakiti nota ĭkapani. ⁵Xesosi sãkire auiãkani apotiitaua ninoa aapoko Teoso imisãkiretinina ĭkapani, ininiã hĩsãpiretanako nixinikamanapitinina ninoa.

Hĩsãpiretariko nitiretakiti Epeneto inakori nixinikamanapitiniri iua. Āsia tixiniã iua merepitipanika auikari Kristo sãkire.

⁶Hĩsãpiretaroko Maria nixinikamanapitiniro oa. Oa iteene parĩkauata ate ĭkapani. ⁷Hĩsãpiretanako ninirimane Ātorõniko, Xõnia pakini nixinikamanapitinina ninoa. Mitxipe ninoa aua notakata kateia ãki. Teoso kãkitimoni iokanatakini iteene imarotana Ātorõniko, Xõnia pakini. Ninoa ipi auikari Kristo sãkire, iua sãkire nauikini apisapanika.

⁸Hĩsãpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹Hĩsãpiretariko Opano nixinikamanapitiniri iua. Iua parĩkauata Kristo ĭkapani atekata. Hĩsãpiretariko nitiretakiti Esitaki nixinikamanapitiniri iua.

¹⁰Hīsāpiretariko Aperi nixinikamanapitiniri iua. Imisiritiko sauaki iua likipatari Kristo sākire auikini. Hīsāpiretanako Arisitóporo aapoko auakani nixinikamanapitinina ninoa. ¹¹Hīsāpiretariko ninirimane Erotxião nixinikamanapitiniri iua. Hīsāpiretanako Apiananiri nakitiakori Nasiso aapoko auakani nixinikamanapitinina ninoa.

¹²Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri ĩkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri ĩkapani. ¹³Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro tirtano nota, ninoro tirtinino atokotxikana. ¹⁴Hīsāpiretanako Asīkiritto, Pirekōtxi, Émisi, Pataropa, Émasi, ikinika aītariakori ninoakata apotiitakaniua pakini nixinikamanapitinina ninoa. ¹⁵Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakaniua pakini nixinikamanapitinina ninoa.

¹⁶Himaaratakakauako, kotxi aītaritakakaua. Kristo nakitiakori ĩkini Teoso misākiretikoātaã apotiitakaniua xinikamanapitai hīte.

Paoro Ōtākikare Mapotōkire

¹⁷Nitariakori iteene nōtākikai hīte. Erepaniko kākiti neenamatzxi nireēkani. Ninoa nirekari Kristo sākire auīākani omanatinina apanakini Kristo sākire auīākani. Na atão ninoa oerekakiti sākiretxiti, ĩniniã atxiīti kākiti takanapari Kristo sākire auikini ninoa oerekakiti xika. Kristo sākire nota oerekakiti hītemoni atão. Ninoa oerekakiti koketakori sākiretxiti. Ninoa moianariakori kona hītxapeua. ¹⁸Kākiti ikara atoko inakani kona parīkauata aāuīte Kristo ĩkapani. Ninoa parīkauata iītona nireēkiti ĩkapani. Imisirienetarina kākiti sākire auīākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. ¹⁹Ikinika kākiti imarotari hīte kaminiri Kristo sākire iaōka, ĩniniã nota iteene poxokoniua hīte ikara atoko ĩniniã. Ninirekari kiīkite ĩnini erekari hīkamini ĩkapani. Ninirekari himimarotakaniri maerekati hīkamini. ²⁰Teoso akamaerekaxiniretakiri, paītiki xipokariko Satanasi posotiire, ĩniniã hīposotari hīokanatiniri Satanasi ĩsini.

Aāuīte Xesosi Kristo ātipirika sikari ĩkinipoko erekari hītemoni.

²¹Tximótxio, notakata parīkauatakari, xinikamanapitai hīte. Ninirimane Arósio, Xasão, Sosipato pakini xinikamanapitai hīte apaka.

²²Nota Tésio inakori iőkatsopatari ia iőkatsopari Paoro ãkapani. Nota apaka xinikamanapitai hĩte, kotxi Apiananiri nakiti nitxaua.

²³Nota Paoro aua Kaio aapoko. Kristo sãkire auiãkani apotiitaua iua aapoko Teosokata isãkirauatinina ãkapani. Iua nirekari himarotiniri iua xinikamanapitini hĩte. Erásito inakori apaka xinikamanapitai. Txineiro nĩkatakari iua. Sitatxi auakani sikakito inĩkata iua. Aĩtari Koato inakori xinikamanapitai hĩte apaka.

²⁴Aãũite Xesosi Kristo ãtipirika sikari ikinipoko erekari hĩtemoni. Ameẽ.

²⁵“Peerekari Teoso,” matxako. Iua posotari ikamataparaxiniretinii hĩte, ininiã kona hĩotokakari hãuikiniri Kristo sãkire. Teoso iokanapirena erekari nota sãpiretakiti, Xesosi Kristo sãkire pakini sãpiretari ikara atoko inakari. Ikara Teoso sãkire kitxakapirĩka !kimarotikori. Uatxa imarotapeẽkaika. ²⁶ĩkorasaaki asãpiretapekari ikara Teoso sãkire, Teoso sãkire sãpiretakani iőkatsopatakiti kitxakapirĩka. Uatxa aimarotari ninoa sãpiretakiti. Teoso auapika inakari paniãtari isãkire sãpiretiko ikini itixiti auakanimoni. Ininiã apakata ikinimane auikiniri isãkire. Apakata ikinimane kaminiri inireẽkiti iaõka.

²⁷Iuanani Teoso txaua. Iuanokara imarotari atão ikinipoko. ãtipirika matxariko iua: “Peerekai pite, kotxi peerekari Xesosi Kristo.” Ameẽ.

1 KORÏTO

Merepanika Paoro Iokanatsopatakiti Korïto Auakanimoni

1 ¹Nota Paoro, Xesosi Kristo iokanatakitino. Teoso akiritano iua iokanatakiti nininiua ïkapani, kotxi inirekari iokanatinino kãkitimoni isãkire nisãpiretini ïkapani. Aïtari Sóseni inakori aua notakata uai. ²Niokanatsopata hïtemoni, kãkiti Xesosi sãkire auiãkani Korïto sitatxiti auakanimoni. Kristo Xesosi makatxakakini hïtxaua Teoso ïkapani. Teoso akiritai hïte iua nakitiakori hininiua ïkapani. Apaka niokanatsopata ikini tãpati auakanimoni, aãuïte Xesosi Kristo uãka akiritakanimoni. Ate auïte Xesosi, ninoa auïte apaka itxaua. ³Aïri Teoso, Apiananiri Xesosi Kristo pakini sikari ikinipoko erekari hïtemoni. Ninoa kamaerekaxiniretai hïte.

Paoro Misãkiretari Teoso Korïto Auakani ïkapani

⁴Ätipirika nimisãkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korïto auakanimoni. Ikara erekari pite sikakiti. ⁵Peerekai pite, kotxi pite kamaerekatari ninoa auini. Pite oerekana ninoa sãkire atão inini ïkapani. Pite kamaimaroretana. Ininiã ninoa sãkire apiaerekata. Ninoa imarore apiaãpota.” Ia atoko nimisãkiretari Teoso.

⁶Hïtemoni asãpiretakiti Kristo pirena auapeka hãkixinireẽ. Ininiã ïteene hãuikari Kristo sãkire. ⁷Ininiã hiãtapakasaakiri aãuïte Xesosi Kristo kanapiriini, ikini sereti erekari Teoso sikakiti aua hïtemoni iua parïka hïkamini ïkapani. ⁸Hïte isikataparaxiniretiniritika ikanapiriini õti apokako. Ininiã maerekati hïtemoni !uari aãuïte Xesosi Kristo